

四庫全書

史部

欽定四庫全書

史部

吳郡志卷十四

至

詳校官監察御史_臣沈孫璉

檢討_臣德生覆勘

總校官編修_臣倉聖脈

校對官助教_臣卜維吉

謄錄監生_臣陸潮愈

欽定四庫全書

吳郡志卷十二

宋 范成大 撰

官吏

祠廟

官吏

後漢彭修會稽人為吳郡功曹時西部都尉宰晁行太守事以微過收吳縣獄吏將殺之主簿鍾離意爭諫甚切晁怒使收縛意修排闥直入拜於廷曰明府發雷霆於主簿請聞其過晁曰受教三日初不奉行廢

命不忠豈非過耶修因拜曰昔任痤面折文侯朱雲
三攀毀欄檻自非賢君焉得忠臣遂原意貸獄吏意
亦以是得名

尹興為吳郡太守楚王英陰結天下名士興在錄中英
敗明帝徵興及掾史五百餘人詣廷尉考治門下掾
陸續主簿梁宏功曹史駟勲備受五毒終無異辭續
母自吳來雒陽作食饋續續雖見考辭色未嘗變而
對食悲泣不自勝治獄使者問其故續曰母來不得

見故悲問何以知之續曰母截肉未嘗不方斷葱以寸為度故知之使者以狀聞上乃赦興等

吳孟仁字恭武江夏人為吳令時不得將家之官每得

時物必以寄母常不先食及聞母亡犯禁棄官

吳志

宋江徽為吳令元凶殺徐湛以黨與併被害

王逡之字宣約少學禮博聞仕為吳令

齊江介謚之子建武中為吳令政深苛人門榜髑髏為

謚首介棄官去

齊周洽洲南人歷吳令廉約無私卒無以殞斂

齊傅翽琰子為官有能名為吳令別建康令孫廉廉問
翽曰聞丈人發姦擿伏惠化如神何以至此答曰無
他也惟勤而清清則憲綱自行勤則事無不理憲綱
行則吏不能欺事理則物無凝滯翽父珪為縣並著
奇績時云諸傳有理縣譜父子相傳靳以示人

王思遠立身簡潔王子貞為吳郡除思遠吳郡丞以本
官行郡事論者以為得人

梁沈浚字叔源涉學有才幹仕梁為吳令有能名

陸蒙事梁為吳令節操甚高

唐鄭渾之咸通末為蘇州督郵談銖為鹺院官鍾福為

院巡關

時湖州牧李起及趙蒙俱狀元人語

曰湖接兩頭蘇聯三尾

嵐齋錄

唐孟庭份郊之父庭份為崑山尉生郊以詩名世或云

份亦能詩

武平一玄宗時自考功員外郎貶蘇州叅軍雖被謫

而名不衰

劉綺莊為崑山尉研窮古今博考傳記作類書一百卷
號崑山編至今傳於世

韋至誠吳縣尉

蕭存字伯誠潁士子亮直有父風能文辭浙西觀察使
李栖筠表為常熟主簿

皮日休字襲美咸通十年為郡從事居官纔一月著書
號鹿門子

丁陳范謝皆錢元璫及子文奉為中吳軍節度使時為節度推官四人俱以長者稱丁名守節晉公謂之祖陳名贊明中允之奇之祖范名夢齡文正公仲淹之曾祖謝名崇禮太子賓客濤之父

邊倣雍熙初為崑山令因舊址新作夫子廟自是縣學始興繼以王禹偁為作記記具縣學條

王禹偁太平興國九年以大理評事知長洲縣雍熙四年召赴闕入朝為名臣今虎丘寺有元之祠堂刊東

坡讚於其上

張文定公安道景祐中為崑山令時吳越歸國未久前
此豪民占田無限歲遠多訟有數十年不決者公召
問所輸租稅幾何大率百纔一二乃悉收其羨田以
賦貧民訟亦息時蔣希魯侍郎守郡得公所著芻蕘
論上之遂舉賢良方正科

韓正彥字師德魏公之姪嘉祐中為崑山令剏石堤疏
斗門作塘七十里以達于郡得膏腴田數百萬頃又

請以輸州之賦十三萬從便輸於縣鳩作塘餘材為
倉廩以儲之民大悅比去遮道以留為立生祠作思
韓記鑱石祠下

章岷字伯鎮嘗為平江軍推官有文聲范文正公有和
章從事鬪茶歌及同登承天寺竹閣詩

賈公望字表之嘗為郡通判時朱勔父子鼎盛奔競者
爭趨其門公望疾之有詩云倏忽向六十萍蓬無奈
何丹心猶奮迅白首分蹉跎正直士流少傾邪朋類

多陽光一銷鑠不復見妖魔面之子賜金帶公望亦
衣三品服偶以朝拜會天慶觀中朱從者見公望所
佩魚睨而視之公望厲聲叱之曰此是年及得來非
緣花石左右皆錯愕朱大街之竟擠之罷去

寇國寶徐州人從陳無已學嘗為吳縣主簿賦詩為左
丞葉夢得所喜詳見雜志門

祠廟

至德廟即泰伯廟東漢永興二年郡守麋豹建於閭門

外辨疑志載吳閭門外有泰伯廟廟東又有一宅祀
泰伯長子三郎吳越錢武肅王始徙之城中纂異記
又云吳泰伯廟在閭門西皮日休詩云一廟爭祠兩
讓君蓋併祠仲雍舊矣今廟在閭門內東行半里餘

門有大橋號至德橋乾道元年郡守沈度重建

修廟記云

在禮祭法聖王之制祭祀其法五其人之應法者十
有四皆古大聖賢有大功烈於民者非此族也不在
祀典夫以大聖賢有大功烈而祀之固宜然祀有祈
焉其施於民又厚厚施不報神其不吐之乎報之之
道不獨牲牢酒醴而已千里之邦必有祠所社稷則
有壇先哲則有廟後世於廟尤極其尊嚴崇像設儼

侍衛見之者凜如也水潦必祈早暘必祈皆長吏之
常事應而有報亦事之常儻入其門陟其堂神所馮
依曾不足以障風雨區區構壘簋簋何施之厚而報
之薄歟吳門巨藩神祠之載祀典者十數而泰伯廟
為雄甚東漢永興二年郡守麋豹肇建於閭門外吳
越武肅王錢氏始內徙之國朝元祐間太守黃履歷
考前政若梅詢若范仲淹若孫覺輩數公淫潦有所
靡不響應答列其事於朝有詔號至德廟崇寧元祀守
臣吳伯舉請封王爵有詔封至德侯建炎擾攘鞠為
灰燼厥後草創殆無以揭虔安靈今天子拔沈公於
尚書郎以直祕閣尹是府至則訪及民利病以次罷
行之其為政寬嚴詳簡允蹈厥中治人事神罔不祇
肅隆興二歲天作淫雨害於穡事民不奠居乾道改
元春二月公飭躬齋祓走祠下而祈焉神顧饗之是
歲麥以有秋府從事請具牢醴以謝公曰不敢廢也
然曷足以報萬分一於是邦人合詞而進曰侯之施

甚厚而廟貌不治之日久大懼神或怨恫祥慶弗下
願采材而改造之公曰是吾心也涓日協辰得夏五
月庚戌吉乃致昭告乃鳩良工斤少府之餘合私橐
之助環材堅甍櫛比墉崇宏舊基植高棟抗修梁藩
垣階祀盡革而一新之所繪之容若欣欣然有喜色
民無老穉相扶攜以觀厥成皆以手加額曰美哉輪
焉誠足以塞民望而報神施矣風霽雨休未則大熟
秋九月甲子落成幾就養府下目覩祈應為不誣公
屬幾紀其實既牢辭弗獲命若虛公之辱是終無以
揚休事而告後人也於是乎書左通議大夫充敷文
閣待制致仕曾幾記皮日休一廟爭祠兩讓君幾千
年後轉清芬當時盡解稱高義誰敢教他莽草紛陸
龜蒙故國城荒德未荒年年椒奠涇中堂邇來父子
爭天下不信人間有讓王張詠至德本無名宣尼以
此評能將天下讓知有聖人生南國奔方遠西山道
始亨英靈豈不在千古暮江橫蔣堂泰伯何為者不

以身為身遜避天下位奔走句吳濱隱德照來世遺
祀傳斯民吁此庶讓國合生庶讓人龔頤正作迎享
送神辭三章云翼翼兮新宮蘭柄兮枿桂祥氛總總
兮高靈下隊君視八紘兮昔何殊於棄屣今復何有
兮一席之墳惠我吳人兮曷日而弭于嗟君來兮我
心則喜君來不來兮我忘食事神迎登歌兮堂上屢舞
兮堂下君來享兮清醑溪毛陸離兮筐筥蓴鱖芳鮮
兮亦有肥羜君不來兮使我心苦神享車兮載旗舟兮
揚颿鼓咽咽兮君當還君肯來兮尚盤桓我心咒咒
兮其無端君不我留兮下土蠶煩福我吳人兮無疾
與患千秋萬歲兮
歌至德以何言神送

吳王夫差廟令村落間有之舊廟無攷鑑誠錄云世傳
此廟拆姑蘇臺木初成唐陳羽秀才嘗題夫差廟時

人謂之題破此廟

陳羽姑蘇臺畔千年木刻作夫差廟裏神幡蓋寂寥塵土滿不知簫

鼓樂何人張詠由來邪正是安危不信忠良任伯詬自古家家有容治何須亡國殢西施

伍負廟在胥口胥山之上蓋自負死後吳人即立此廟

乾道間復修之規制猶陋盤門裏又有負廟即雙廟

是也

梁簡文帝立國資孝本循忠全令名舟裏多奇計蘆中復吐誠偃月交吳艦魚麗入楚兵九功

推妙算千載籍餘聲洪濤猶鼓怒靈廟尚淒清行潦承椒奠宮懸雜鳳笙無勞晉后璧詎用楚臣纓密樹臨寒水疎扉望遠城窻寒野霧入衣帳積苔生惟有
三青鳥斂翅時逢迎張詠胥也應無憾至哉忠孝門
生能酬楚怨死可報吳恩直氣海濤在片心江月存
悠悠當日者千載祗慙魂楊備出境鞭屍報父讎吳

兵勇銳越兵憂忠魂怨氣
江雲在日見爐香煙上浮

南雙廟在盤門裏城之西隅二廟左英烈王伍負也右
福順王隋陳果仁也果仁又稱武烈帝或云五代初
常潤尚屬淮南果仁廟在常潤間錢氏得常潤遂移
廟于蘇按吳志孫權既稱尊號諡堅曰武烈皇帝帝
號與果仁同况堅墓西地記謂在城南二里許去盤
門密邇疑此廟恐是祠堅爾建中靖國中太守吳伯
舉重修是時蔡京自翰林長罷過吳門為作記并書題

記曰今天子即位元年愛重黎庶慎簡牧守詔以左
史吳公為直祕閣知蘇州公至暮歲政化大洽姦盜
屏斥牒訟疎簡民用康靖公曰噫嘻先成民而後致
力於神古之善經也今俗且治矣其錄境內神祠廢
壞者以公帑所餘畢修之使安定休止無有崇厲為
吾民憂吏白城西南隅有舊廟二荒陲當完按圖經
暨州縣版祝所稱一為永昌武大王一為福順賢德
王而邦人由閭閻市井及學士大夫自昔相傳皆以
為伍子胥廟歲時祭享甚盛雜然同辭莫可奪也或
言故隋將陳果仁嘗以陰兵助錢氏伐淮寇有功錢
氏崇報之請於梁朝封福順王又使諸郡皆為建廟
則福順之號為果仁無疑至永昌之稱杳邈不可稽
考不知為何時人今邦人獨以子胥之故願眾私出
力以卒營繕協謀齊慮鳩工類材填郭溢郭奔走相
屬惟恐其後故月不更朔而廟已告新今或稱號仍
舊殆恐無以安子胥之靈而失邦人所以完廟本意

敢以為請公曰然昔吳瀕海建國恃水作險內虞汎
濫外闕守禦盡匱之與渚而魚鼈之與居肇自子胥
相土味水築置城郭實倉廩治兵庫闢門二八以象
風卦始能啓塞有時疏導無壅除昏墊蕩析之虞而
存抱闕擊柝之警更祀幾百厯載踰千其城域門號
至今因之而不變是子胥嘗能安吾民也不顧小義
卒雪大恥勇於納諫以至殤身二者皆人之所難昔
日之不死蓋以為吾父今日之死蓋以為吾君由前
足以教人之為孝由後足以教人之為忠忠孝之跡
昭著前史殊尤卓絕震暴耳目匹夫匹婦可以與知
及其久也宜胥化焉故後漢太守麋豹按行屬城問
風俗所尚其功曹唐景曰處家無不孝之子立朝無
不忠之臣僕非漸清餘風被服成俗疇能臻此哉是
子胥嘗能教吾民也既能安之又能教之由父傳子
由子傳孫綿綿聯聯以至今日厥德茂矣宜當血食
此地而廟貌不立於城闕乃至斯民憑假它祠以崇

敬奉此殆疇昔守職者之闕吾敢不勉祭法曰法施於民則祀之以死勤事則祀之以勞定國則祀之非此族也不在祀典今福順雖有功異代事跡僅存民弗敬慕蓋託于胥獲享不替而武氏名字功德闕然堙滅無所考證使子胥不忘斯民實鑒臨之則武亦安敢正位而饗也禮固有以義起者吾將請於天子與正英烈之號以嘉廟額而用丕承民志殆或可乎武林元時敏曰好惡靡常莫能自克惟民為然古之君子因民所好之善而導之反民所好之非而禁之好惡得正而其治成矣鄭人欲祀伯有子產從而封焉鄭人欲祭河伯西門豹從而禁焉二子豈異意哉顧民好惡有當否也今吾民願祀子胥甚勤是知有功之不可忘而忠孝之可勸也因而導之使成於善此所謂不嚴而治者顧豈俗吏之所能為耶今公一舉廢事而順於民安於神又足為天下之勸三善備矣不可不書也於是乎書建中靖國元年十二月二

十二
日記

春申君廟在子城內西南隅即城隍神廟也

新廟記云
韜軒蒞郡

十有一月矣猥以薄材謬承重寄欵自淮服半刺起為江南方伯郡領二十地亘五千皇皇者華幾慙輝道兢兢其志常誠飲冰周爰諮詢申命行事損以懲忿室欲益以改過遷善豺狼擁路埋輪以逐之騏驎伏檻攬轡以騁之宣王化而盡覺風行安甯而不知日用寬猛相濟威恩無洽長吏肅警疆土又寧日月其除冰霜再履始也務不暇給今也處有餘閑別祈神仙獲歲豐稔乘公堂之宴縱靈廟之遊城不復隍樹先禁伐闌陬荒以毀梁木小而摧乃喟然歎曰神必依人人茲望福依無所據福安來哉昔越踐滅吳楚威滅越考烈王繼立春申君登相封江東之巨縣城吳墟為大都專主威權救國災患與趙魏為四

公子招賓旅有三千人擠聘使之玳簪誇上客之珠履王久無嗣君方患之璣兮李園託其女弟既歆然而有姓遂祕之以獻王王乃殂落子為君主母望之人靡信母望之禍適興舍人其亡死士常偵棘門之下蒿里相催天乎天乎胡寧忍此今尹多居郢國假君恒守吳宮烏焚其巢何笑號之先後蛟沒其舳繫父子之沉埋夷盡其家賊圍之故一朝冀將滅口千古猶為痛心今邦牧所居使臣所理故宮之內故事備聞於是大葺堂庭廣修偶像春申君正陽而坐朱英配饗其側假君西廂視事上客東室齊班李園死士庚方授戮僕夫閑駿辰位呈形大雪久寃之魂更申如在之敬家屬穉穉展哀榮也儀衛肅肅振威名也巨木臃腫而皆古小栽青葱而悉新總之一門是謂神府宜正名於黃相削訛議於城隍昔韓整守吳勅吳伯之廟太史適楚壯楚相之宮余固蕪之言可則也神有新宇亨之落之人有貞石追之琢之我躬

披文紀之告之君宜密應祐之福之初余之拜命也
表授廣陵糾曹張顥兵曹蘇相為判官安喜尉李崗
為支使同郡舊知精明深識異途新合厯落瓌材三
人冀有我師四牡慎行爾職欽刷往賢之恥歎垂後
昆之裕長史宋尚主臣餘慶佑嶽良能司士楊彥琮
每憂司存實稱佳吏預乎作廟翼翼觀乎降神欣欣
咸亦相因斯焉附出唐天寶單闕歲除日中散大夫
守吳郡太守兼江南道採訪處置使柱國天水趙居
貞記

郁史君廟在太湖衡山中

聖姑廟在洞庭晉王彪二女相繼卒民以為靈而祀之
紀聞云唐人記洞庭山聖姑祠廟云吳志姑姓李氏

有道術能履水行其夫殺之自死至唐中葉幾七百年顏貌如生儼然側卧遠近祈禱者心至則能到廟心若不至風迴其船無得達者令每一日沐浴為除爪甲傅粧粉形質柔弱只如熟睡盖得道者歟辨疑志云唐大厯中吳郡太湖洞庭山中有昇姑寺有昇姑廟其棺柩在廟中俗傳姑死已數百年其貌如生遠近求賽歲獻衣服粧粉不絕人有欲觀者其巫祕密不可云開即有風雨之變村間故事無敢竊窺者

巫又云有見者衣裝儼然一如生人有李七郎荒狂
不懼程法率奴客啓棺觀之唯朽骨髑髏而已亦無

風雨之變二說今皆無考姑存舊傳云

皮日休洛神有靈逸古廟

臨空渚暴雨駭丹青荒蘿繞梁梧野風旋芝蓋饑烏
銜椒糈寂寂落楓花時時鬪魑鼠常云三五夕盡會
妍神侶月下留紫姑霜中召青女俄然響環珮倏爾
鳴機杼樂至有聞時香來無定處目瞪如有待魂斷
空無語雲雨竟不生留情在何處陸龜蒙渺渺洞庭
水盈盈芳嶼神因知古佳麗不獨湘夫人流蘇蕩遙
吹斜領生輕塵蜀絃駭霞碎吳綃盤霧勻可憐飛燕
姿合是乘鸞賓坐想烟雨夕蕪之花草春空登油壁
車窈窕誰相親好贈玉條脫堪攜紫綸巾殷勤撥
香池重薦汀洲蘋明朝動蘭橈不翅星河津

靈祐廟即慧感顯祐善利夫人廟在能仁寺內夫人陸氏梁衛尉卿僧瓚之女僧瓚捨宅為寺夫人就居之是為重玄寺寺祀夫人為伽藍神號聖姑元符元年郡大旱通判祝安上攝郡禱而應以其事聞錫封慧感夫人郡人奔湊致禱相與社而稷之闔境祠廟莫能尚也其節次加封及始末靈感之跡具諸記中

碑陰

記元符元年歲在戊寅夏吳中大旱徧禱羣祀畧無應者是歲高田不穫人多暵死負販之民皆捨其業而以售水自資涉冬至二年春夏之交舟車益不通百貨湧貴城中溝澮堙淤發為疫氣通判軍州事朝

請郎祝公適領郡事廼用故事早暮分禱於所宜祀者一日會承天寺客言此乃梁衛尉卿陸僧瓚捨其第為之昔號廣德重玄寺陸卿有女子不嫁經營其事既死祠于寺之東廡開寶中吳越忠懿王朝京師道出吳江大風幾覆舟見女子拯之自言重玄寺之神也本國加封號感應聖姑今里中事之甚敬公聞即謁且言明日致禱既歸宿齋于廳事舉家沐浴蔬食相約得雨而後復膳黎明躬至祠下再拜而言曰郡承連年之旱流亡疾沴相乘而作農事失時歲且大饑雖某有罪獲戾不逃然將為國家之憂神其哀之能即致雨尚可救也屏息聽命寺僧獻兆曰神告即雨眾甚不然憮然而退憩於齋堂左右告曰天油然作雲矣未及命駕澍雨應至老幼驩呼於道至有不忍以登筮自庇者即日盈尺闔境告足自爾有請必應如取所寄邦人無復水旱之憂歲大有年乃具事白于外臺使者以聞詔書褒美特封慧感夫人秩

視公侯列于典祠按陸氏得姓於齊宣王之少子至漢有字伯元者仕為吳令遷豫章都尉既卒吳人思之迎其喪葬于胥屏亭子孫遂家焉伯元生襄賁令盱眙生本州從事鴻鴻生渤海太守建建生本州從事曄曄生御史中丞京兆尹璜璜生弘農都尉文文生親親生潁川太守尚書令閎閎生桓桓生揚州別駕續續生襄襄生吳城門校尉紆紆生九江都尉太學博士駿駿生選選生尚書掾瑁瑁生潁潁生海虞令濯濯生漢公漢公生冽冽生本郡從事元之元之生高平相員外散騎常侍英英生晉侍中太尉興平康伯玩玩生五兵尚書侍中始始生祕書監侍中萬載萬載生宋東陽太守子真子真生齊南兗州刺史惠曉惠曉生梁太常卿使倖生衛尉君凡二十八世冠冕不絕皆有才德名在史冊自興平康伯至祕書監父子兄弟五世內侍嘉祥積慶挺生夫人惟夫人其生也精修正潔入清淨海其歿也通于神明有感斯

欽定四庫全書

卷十二

應故能致朝廷報稱之禮甚厚既以詔書刻于石將求老於文學之士為之記以傳不朽搢紳耆老且請撫其槩於碑陰乃為之叙云戊戌嘗聞朝請公元祐間以奉議郎知藁城暴雨滹沱河水盛漂泛林木室廬蔽川而下水及城門雉堞凜然將決老弱皇恐奔潰調急夫督水工雨且不止人無所施其力公迺朝服涉濇立于隄上鞠躬申禱水溢隄壞相去數尺吏民救止公堅立不動以笏叩頭願以身任責於是雨小止水波稍回河流遂復其所潰陷之地明日復為平陸如故使者方欲言諸朝會公秩滿請罷遂已北方之人至今能道其詳惟公憂國愛民所至以誠心格物如此是可書也故附于左元符三年歲次庚辰秋八月乙未朔十日甲辰布衣林戊記

天王堂在子城西北隅雖一小廟蓋古屋也建炎兵難

盈城宮室悉為煨燼惟郡南覺報小寺以金師營幕
所寓不及燬而此堂巋然獨存郡人至今敬之

吳郡志卷十二

欽定四庫全書

吳郡志卷十三

宋 范成大 撰

祠廟下

包山廟在吳縣西南一百里

土山卜將軍廟在崑山縣頃於山下菜圃朱四家得斷碑云唐卜府君墓府君諱真碑字雖漫漶多闕文尚可辨然無將軍之號

三高祠在吳江縣垂虹橋南即王氏臞庵之雪灘也昔

堂在垂虹南圯極偏仄乾道三年縣令趙伯虛徙之
雪灘三高者范蠡張翰陸龜蒙也此祠人境俱勝名

聞天下

祝謚三高記易稱知幾其神乎君子見幾而作不俟終日須之則後矣是維成功之下不

可以久居亡道之人不可與久處兵亂之世不可以苟仕知斯三者則知幾矣遲之其殆危乎昔者越相范君既苦身勑力與勾踐深謀踰二十年滅吳霸越用復會稽之恥謂大功之下難以久居暨還返國遽書謝王去之乘輕舟浮五湖莫知其所終極而大夫種沈吟不時決卒用誅死厥後七百有餘歲晉有張李鷹自吳入洛方時齊王問專權怙已署君東曹掾君知其不終難與獨處慨千里之羈宦臨秋風而長懷託興旅鱸促駕告歸無何同敗又後五百有餘歲唐有陸魯望當咸通乾符間寇亂方殷隱身自放扁舟

蓬席脩然笠澤甫里間時號江湖散人辟署無所從
徵命無所答優游自終竟全亂世如三先生可謂知
幾君子哉雖地異時殊默語不同然去而自全咸遂
其高致均也吳江邑地瀕帶具區舊有長橋橫絕江
湖之間脩檻浮梁植立千柱電埏沸潏蜿如長虹巨
浸浮空涵泳星日包山洞庭如在天外風帆島樹滅
沒煙際東西行者以為三吳遊觀之偉好事者又寫
鴟夷子皮之像配以江東步兵甫里先生立祠橋梁
之上榜曰三高蓋其平生所遊居也貞風素烈尚凜
然山間可想聞而概見歲庚申秋七月初吉括蒼祝
鎰與大梁人趙九齡置酒橋亭悲歌望遠舉觴釃江
慷慨言曰去危即安夫人而願之然皆反焉者何哉
知幾者鮮也雖並世同交如大夫種功非不多也顧
常侍材非不周也鹿門子學非不揆也或死憂而辱
何也居成功處亡道仕亂世黽勉畏去歲之卑也其
視知幾者遠矣惟鴟夷子道大功宏百世師仰而張

陸二子羸然山澤之臞像而配之幾不倫矣豈不曰
巫隱巫去身名俱全以是為同曰三高云者豈異稱
哉後之君子苟寵祿之是耽發機之禍忽忘不戒聞
三高之風仰三高之像庶少警乎不然涉斯流也登
斯梁也其無媿乎後將有悔乎其無悔乎始橋之置
於慶厯歲中建炎初載北兵南收并及祠宇火之無
餘後六年當紹興癸丑歲今吳郡楊君同與今御史
軍父祝君師龍為邑尉蓋因其廢址實勅而新之復
立祠如故云謹記范成大三高祠記乾道三年二月
吳江縣新作三高祠成三高者越上將軍姓范氏是
為鵠夷子皮晉大司馬東曹掾姓張氏是為江東步
兵唐贈右補闕姓陸氏是為甫里先生三君生不並
世而鵠夷子皮又當一用人之國功大名顯而去之
李鷹魯望蕭然臞儒使有為於當年其所成就固不
可喻度要皆以得道見微脫屣天刑清風峻節相望
於松江太湖之上故天下同高之而吳江之人獨得

奉蒸嘗以夸於四方若曰此吾東家丘云爾邑大夫
趙伯虛以故祠偪陋將改作鄉老王份獻其地雪灘
乃築堂其上告遷而奠焉且屬諸石湖范成大為之
辭噫不有君子其能國乎今乃自放寂寞之濱掉頭
而弗顧人又從而以為高此豈盛際之所願哉後之
人高三君之風而跡其所以去為世道計者可以懼
矣至於豪傑之士或肆志乎軒冕宴安留連卒悔於
後者亦將有感於斯堂而成大何足以述之然屈平
既從彭咸而桂叢之賦猶招隱士疑若隱處林薄不
死而仙況如三君蟬蛻溷濁得全於天者嘗試倚楹
而望水光浮天雲日下上風颿煙蓬飄忽晦明意必
往來其間成大亦何足以見之姑敘小山作歌三章
以招焉遂從而歌之曰若有人兮扁舟撫湖海兮遠
遊衆芳媚兮高丘忽獨君兮不可留長風積兮浪波
白蕩搖空明兮南北一色鏡萬里兮鞭魚龍列星剡
剡兮其下孤蓬眇顧懷兮斯路與涼月兮入滄浦戰

爭蝸角兮昨夢一笑水雲得意兮垂虹可以樣權仙
之人兮壽無期樂哉垂虹兮去復來載歌曰若有人
兮橫大江秋風起兮歸故鄉鴻冥飛兮白鷗舞吳波
鱗鱗兮而在下嗟人胡為兮天地四方美無度兮吾
之土膾脞鱸兮雪霏登菰蓴兮芼之水仙嬪兮胥命
君可望兮不可追頰倒景兮揮碧寥娛燕息兮江之
臯萊蘋堂兮廡杜若一杯之酒兮我為君酌又歌曰
若有人兮北江之渚披雲而晞兮潁烟雨菊莎兮杞
棘歲晚晚兮何以續君食餽五鼎兮腥腐羞三泉兮
終古千秋風露兮歸來故墟月明無人兮蒼石與語
牛宮如兮生蒲荷潮西東兮下田一波訪南徑兮鄰
曲山川良是兮丘壠多稼九畹兮今其刈聊春容兮
茲里是歲六月既望書遺邑人使習以脩祠伯虛請
遂以為記程俱三高堂詩序蠡位越相祿萬鍾去之
如涕唾則後世角毛銖之得冒坎獲而不省者可以
少沮翰進退無必隨時而保身則出處之意得託菰

鱸以示好又何深哉龜蒙江湖一匹夫然於其不合雖執位無加也其交如皮日休終見殺於賊巢彼獨挺然玉峙無一罅可指撻與夫攫金挾炭之夫蓋萬萬矣夫左手據圖籍右刀掠其吭雖冥奄不為也揣是而求之輕重得矣然世固有抱利權逐勢位死不反顧為天下僂笑者幾何人哉其於輕重未思是又出冥奄者之下也然則是三子者祠而旌之實可以訓元符二年吳江縣立三子者像明年三月甲子安於祠堂令率僚佐拜而奠之其謂俗奔競久矣冀得守道自重確乎不可拔足以風百里而驅天下者將矯浮俗而歸之庶幾清節之為貴何望之而未見抑有之而未聞邪今居是邑仰三子之志意其知時而退不迷於出處之道蓋君子之所悅聞也凡我同志其系之以詩李華鷓鴣夷子皮贊龍螭幽谷非時則伏蟬蛻高枝飲露而飛進如風行退若雲歸冥冥其幾赫赫其現於越霸興強吳蕩夷功成不居先生傳之

蘇軾書三賢畫詩誰將射御教吳兒長笑申公為夏
姬却道姑蘇有麋鹿更憐夫子得西施右范蠡浮世
功名食與眠季鷹真得水中仙不須更說知幾早直
為鱸魚也自賢右張翰千首文章二頃田囊中未有
一錢看却因養得能言鴨驚
破王孫金彈丸右陸龜蒙

煥靈廟在常熟縣破山唐咸通中所建龍堂也本朝政

和二年賜今額五年加賜宣惠侯

龍堂記禮山林川
谷丘陵能生雲為

風雨見怪物皆曰神若然者龍亦能為風雨見怪物
則其澤之在民厚矣神而祀之又宜矣常熟澤國也
風雨怪物日作于民有在其地者苟祀之至被其利
祀之不至民受其禍汝南周君為令之初年夏且旱
崇其神于破山之上果應以應君曰受其賜徒崇以
報不可也於是命工以土木介其象為室以蔭之著

之於典用潔其祀於是風雨時怪物止水旱不為厲連歲以饗其神之澤乎君之祀乎凡霄者春秋之道皆書之勤民之祀也君為其祠已乞文其事日休嘉其為志在民故從之咸通十三年二月十九日前攝嶺南東道節度巡官試祕書省校書郎皮日休記新建煥靈宣惠侯廟記政和二年漕臺以常熟龍祠祈禱感應之實聞于朝越明年制曰可宜賜煥靈廟為額邑人以爵號未崇無以昭神既後二年縣以狀列於府府言於部刺史遂復保奏焉制曰可特封宣惠侯於是縣大夫率佐官祇奉休命宣于祠下而邑之士女雲集將退咸告丞魯詹曰侯之廟宇君與縣大夫謀之侯之封秩君與縣大夫請之今堂宇將畢而綸誥適班盍記之以侈其事惟侯之祠舊在破山興福之澗上父老相傳其誕育之異肇自梁武之初我宋龍興妙選守令為民師帥太平興國中蔣侯文懌來宰是邑距天監幾五百歲矣時積潦泛漲躬禱於

侯不移晷雲斂而霽歲則大獲乃迎侯與聖母之像
歸于頂山壽聖之西偏是日白龍示見盤旋冢上彩
雲之瑞焜耀山間迄今又幾一百有四十載矣邑人
乃相與作廟于山腰龍池之上侯之先壟在焉經歷
若是之久始克成茲豈偶然哉佳城我我方治灩灩
峰巒疊秀回抱如翼長江浩蕩沃野曼衍左則福巖
狼巖右則虎丘昆玉逆岑寸碧列岫橫翠雲煙之祥
疑在仙島氣象之偉實冠吳中觀侯之初以神力遷
葬而陰陽家流咸謂勝地今新廟奕奕實下瞰焉庸
詎知其非侯之意哉政和五年十一月庚辰既望侯
之告下十二月朔廟前後殿成若門墉廊廡蓋將有
待於來者焉政和五年十一月日文林郎知平江府
常熟縣丞
魯詹撰

東嶽廟在常熟縣福山鎮

重修嶽廟記維我宋真宗皇帝東幸泰山告功于天大修

封禪禮泰山之神顯冊褒嘉位號崇隆得非衛社稷
福生靈運功烈於冥冥之際宜有所報稱歟是故四
方萬里不以道塗為勞往奉祀事往往規模岱嶽立
為別廟多矣然未有盛於姑蘇之福山也福山廟經
始於至和之中垂六十年樓殿門廊并諸從舍巍然
而輪與江淮閩粵水浮陸行者各獻其所以效歲
時來享之誠上祝天子萬壽且以祈豐年以後保其
家凡有求必禱焉率以類至號曰會社簫鼓之音相
屬於道不知幾千萬人不及之乎太山則之福山焉
福山臨江海上歸焉蒨鬱岡巒環回殆亦勝地父老
云肇祀之日有幅畫乘潮水至乃嶽神像也居民得
之欽事而加信焉山初號覆釜蓋因其形似後易名
福山廟據其上遂為遠邇祈福之地豈偶然哉
政和七年八月乙亥鄉貢進士崑山魏邦哲記

陽山靈濟廟在澄照寺傍白龍母廟也無碑碣可攷有

僧祖照者以父老相傳述其事於壁云東晉隆安中
山下居民繆氏家有女及笄出行風雨暴至天地陡
暗避於今所謂龍塘之側俄有一白衣老人語女曰
氏族為誰居何所女答姓繆指山之西曰我家舍於
陽山三峰之下家有父母老人曰天色如此吾無所
歸欲假館待旦而前可乎女曰當告父母老人強之
再三遂首肯語竟遽失老人所在女歸有姓父母惡
之逐出丐食鄰里明年三月十八日至今所謂龍塚

之上產一肉塊居民怪之驚棄水中脩焉塊破化而
為龍夭矯母前若有所告其母驚絕於地即有風雨
雷電飛沙折木咫尺不辨人物之異既開霽但見白
龍昇騰而去眾乃厚葬其母自後累降巫語始祠之
於山巔而雨暘失候祈禱必應太平興國間建廟於
山南曹巷熙寧九年遷于澄照寺之東隅建炎間主
僧覺明復一新之相傳龍子分職瀟湘每歲是日必
歸山間風雨淒冷人以為龍子誕日云過是山中方

有春意其去也或變怪之狀見於雲間紹興十九年
六月某日奔雲變驟起於是山俄頃盲風驟雨大作
龍自郡城過捲去女牆數百丈居人余氏家小亭吸
入雲中又有負販者被吸復墮而無傷焉又云昔有
白鬚老人至鎮江江步買船自云從長沙來與船人
錢十千先付五千餘錢約至蘇州陽山看親處還登
舟即令篙工恣睡日暮抵許市上岼去蓋已三百六
十里矣舟人至山下尋覓值風雨大作避於廟中於

像前得錢五十方悟神龍之歸乃以錢設僧供辭謝而去比歲祈龍母屢應大吏以聞紹興二十九年四月詔賜靈濟廟為額乾道四年告下封顯應夫人

靈濟廟在府東南舊五龍堂也淳熙十年秋大旱郡守耿秉即設廳作祈雨道場設行雨龍王位於東西序有蜥蜴見於香案果飮之上蜿蜒不去終日雲合秉以杯珎祈之若有靈異已而大雨三日具以事聞詔賜靈濟廟為額

甫里廟甫里在長洲縣東南五十里鄉人祠陸龜蒙於此至今不廢

黃姑廟在崑山縣東二十六里地名黃姑父老相傳嘗有牽牛織女星精降焉女以金篦劃河河水湧溢今村西有百沸河鄉人異之為立祠舊列牛女二像後人去牽牛獨祠織女禱祈有應歲七夕鄉人醵集廟下占事無毫釐差舊有廟記今亡之案荆楚歲時記牽牛謂之河鼓後人訛為黃姑然古樂府有云黃姑

織女時相見李太白詩黃姑與織女相去不盈尺則
指牽牛為黃姑李後主詩乃云迢迢牽牛星杳在河
之陽粲粲黃姑女耿耿遙相望又以織女為黃姑事
久愈訛矣

吳郡志卷十三

欽定四庫全書

吳郡志卷十四

宋 范成大 撰

園亭

晉辟疆園自西晉以來傳之池館林泉之勝號吳中第一
辟疆姓顧氏晉唐人題詠甚多陸羽詩云辟疆舊
林園怪石紛相向陸龜蒙云吳之辟疆園在昔勝槩
敵皮日休云更葺園中景應為顧辟疆本朝張伯玉
云于公門館辟疆園放蕩襟懷水石間今莫知遺跡

所在考龜蒙之詩則在唐為任晦園亭今任園亦不可攷矣

唐褚家林亭松陵集倡和云在震澤之西皮日休詩云茂苑樓臺低檻外太湖魚鳥徹池中當在松江之傍也今吳中褚姓尚多亦有登進士科者

任晦園池晦嘗為涇縣尉歸吳作圃為時所稱皮日休云有深林曲沼危亭幽物陸龜蒙詩云吳之辟疆園在昔勝槩敵不知佳景在盡付任君宅蓋任晦得顧

辟彊舊園以為宅也

皮日休任晦園亭任君恣高放
斯道能寡合一宅閑林泉終身

遠翳離嘗聞佐浩穰散性多僊
偕上玉盃反音欸爾解其綬遺之如棄
鞞歸來鄉黨內却與親朋洽開
溪未讓丁列第方稱甲入門約
百步古木聲震震廣檻小山歌
斜廊怪石夾白蓮倚欄植翠鳥
緣簾押地勢似五瀉巖形若三
峽猿眠但脰肭鳬食時唳啞撥
符下文竿結藤紫桂檝門留醫
樹客壁倚栽花鍾度歲止褐衣
經旬唯白恰多君方閉戶顧我
能倒屣請題在茅棟留坐於石
榻魂從清景遯衣任煙霞裏階
墀邇任上枕席鷗方狎沼似頗
黎鏡當中見魚貶杯杓悉杉瘤
盤筵盡荷葉閒斟不置罰閒奕
無爭劫閒日不整冠閒風無用
筵以斯為思慮吾道寧疲於衣
衣競堆環鼓吹爭韉鞍欲者解
擠排詒者能詰譎權豪暫翻覆
刑禍相填歷此時一圭竇不肯
饒閭闔有第可棲息有書可漁
獵吾欲與任君終身以斯慍陸

龜蒙吳之辟疆園在昔勝槩敵前聞富脩竹後說紛
怪石風煙慘無主載祀將六百草色與行人誰能問
遺跡不知清景在盡付任君宅却是五湖光偷來傍
簷隙出門向城路車馬聲轡轡入門望亭隈水木氣
岑寂隼牆繞曲岼勢似行無極十步一危梁乍疑當
絕壁池容澹而古樹意蒼然僻魚驚尾半紅鳥下衣
全碧斜來任公子擺落名利役雖將祿代耕頗愛巾
餘脉竭來任公子擺落名利役雖將祿代耕頗愛巾
隨策秋籠支遁鶴夜榻戴顓客說史足為師譚禪差
作伯君多鹿門思到此情便適偶蔭桂堪帷縱吟苔
可席顧余真任誕雅遂中心獲但喜醉還醒豈知玄
尚白甘閑在雞口不貴封龍額即此自怡神何勞謝
履公

滄浪亭在郡學之南積水彌數十畝傍有小山高下曲

折與水相縈帶石林詩話以為錢氏時廣陵王元璩
池館或云其近戚中吳軍節度使孫承佑所作既積
土為山因以瀦水慶厯間蘇舜欽子美得之傍水作
亭曰滄浪歐陽文忠公詩云清風明月本無價可惜
只賣四萬錢滄浪之名始著子美死屢易主後為章
申公家所有廣其故地為大閣又為堂山上亭北跨
水有名洞山者章氏併得之既除地發其下皆嵌空
大石人以為廣陵王時所藏益以增累其隙兩山相

對遂為一時雄觀建炎之後歸韓蘄王家

蘇舜欽滄浪亭記予

以罪廢無所歸扁舟南遊旅於吳中始僦舍以處時
盛夏蒸燠土居皆褊狹不能出氣思得高爽虛闊之
地以舒所懷不可得也一日過郡學東顧草樹鬱然
崇阜廣水不類乎城中並水得微徑於雜花脩竹之
間東趨數百步有棄地縱廣五六十尋三向皆水
也杠之南其地益闊旁無民居左右皆林木相虧蔽
訪諸舊老云錢氏有國近戚孫承佑之池館也坳隆
勝勢遺意尚存予愛而徘徊遂以錢四萬得之構亭
北碕號滄浪焉前竹後水水之陽又竹無窮極澄川
翠輻光影會合於戶軒之間尤與風月為相宜予時
榜小舟幅巾以往至則酒然忘歸觴而浩歌踞而仰
笑野老不至魚鳥共樂形骸既適則神不煩觀聽無
邪則道以明返思向之汨汨榮辱之場日與錙銖利
害相磨戛隔此真趣不亦鄙哉噫人固動物情橫于

內而性伏必外寓於物而後遣寓久則溺以為當然
非勝是而易之則悲而不開唯仕宦溺人為至深古
之才哲君子有一失而至於死者多矣是未知所以
自勝之道予既廢而獲斯境安於冲曠不與衆驅因
之復能見乎內外失得之源沃然有得笑閱萬古尚
未能忘其所寓自用是以為勝焉舜欽滄浪詩一選
抱幽山居然城市間高軒面曲水脩竹慰愁顏迹與
豺狼遠心隨魚鳥閑吾甘老此境無暇事機闕滄浪
觀魚瑟瑟清波見戲鱗浮沈追逐巧相親我嗟不及
羣魚樂虛作人間半世人滄浪靜吟獨遠虛亭步石
缸靜中情味世無雙山蟬帶響穿疎戶野蔓盤青入
破窻二子逢時猶死餓三閭遭逐便沈江我今飽食
高眠外惟恨澄醪不滿缸滄浪懷友滄浪獨步亦無
惊聊上危臺四望中秋色入林紅黯淡日光穿竹翠
玲瓏酒徒漂落風前燕詩社凋零霜後桐君又甞來
還徑往醉吟誰復伴衰翁獨步花枝低歌草色齊不

可騎入步是宜時時攜酒只獨往醉倒唯有春風知
又初晴遊夜雨連明春水生嬌雲濃澹弄微晴簾虛
日薄花竹靜時有乳鳩相對鳴歐陽修子美寄我滄
浪吟邀我共賦滄浪篇滄浪有景不可到使我東望
心悠然荒灣野水氣象古高林翠阜相回環新篁抽
筍添夏景老枿亂發爭春妍水禽閑暇事高格山鳥
日夕相啾喧不知此地幾興廢仰視喬木皆蒼煙堪
嗟人迹到不遠雖有來路曾無緣窮奇極怪誰似予
搜索幽隱探神仙初尋一逕入蒙密豁見異境無窮
邊風高月白最宜夜一片瑩淨鋪瓊田清光不辨水
與月但見空碧涵漪漣清風明月本無價可惜祇賣
四萬錢又疑此境天乞與壯士憔悴天應憐鵝夷古
亦有獨往江湖波濤渺翻天崎嶇世路欲脫去反以
身試蛟龍淵豈如扁舟任飄兀紅蕖綠浪搖醉眠丈
夫身在豈長棄新詩美酒聊窮年雖然不許俗客到
莫惜佳句人間傳胡宿竄逐本無罪羈窮向此忘野

煙含悵望落日滿滄浪亂草荒來綠幽蘭死亦香楚
魂招不得秋色似瀟湘胡程昔聞滄浪亭未濯滄浪
水先賢眇遺跡壯觀一何侈飛橋跨木末巨浸折胡
壘糟牀行萬壑繚牆周數里廢興固在天無用觀物
理緬懷嘉祐世周道平如砥相君賢相君子美東南
美如何一網盡禍豈在故紙青蠅變白黑作俑茲焉
始所存醉翁文垂耀信百世無忘角弓詠嘉樹猶仰
止同來二三子感歎咸生起縹緲醕新汲毀譽均一
洗忽逢醒狂翁一別垂二紀雋哉老益壯論事方切
齒我欲裂絳幔推着明光裏安得上天風吹落君王
耳梅堯臣寄題滄浪亭聞買滄浪水遂作滄浪人置
亭滄浪上日與滄浪親宜曰滄浪叟老向滄浪濱滄
浪何處是洞庭相與鄰竹樹種已合魚鱗時可緡春
羹茭白菰夏鼎烹紫萸黃柑摘霜晚香稻炊玉新行
吟招隱詩懶戴醉中巾憂患兩都忘還往誰與頻昨
得滁陽書語攸事頗真曩子初去國我勉勿迷津四

方不可之中土百物淳今子居所樂豈不遠埃塵被
髮異太伯結客非春申莫與吳俗尚吳俗多文身蛟
龍刺兩股未變此遺民讀書本為道不計賤與貧當
須化閭里庶使禮義臻劉歆觀滄浪亭石感而有作
蘇君在朝人不知蘇君既没人悲之流風遺書見稱
道高文大句爭提撕壁間草隸亦不置剝苔堆立無
棄遺乃知死不與人共利害而後不為時所疑滄浪
亭空卉木老古石蒼蒼顏色好無脛猶能千里來致
身忽在都門道帝都王侯好事多相看自悔取不
早君不見吳興長史春襴衫閉門抱恨長枯槁

南園吳越廣陵王元璩之舊圃也老木皆合抱流水奇
石參錯其間王禹偁為長洲令常攜客醉飲焉有詩
曰天子優賢是有唐鏡湖恩賜賀知章他年我若功

成後乞與南園作醉鄉大觀末蔡京罷相欲東還詔
以園賜之京有詩云八年帷幄竟何為更賜南園寵
退歸堪笑當時王學士功名未有便吟詩禹偁詩石
尚存續經云舊有三閣八亭二臺龜首旋螺之類歲
久摧圯者多相傳猶有流杯四照百花樂堂惹雲風
月等處每春縱士女游觀兵火之後皆不復有今園

屬張循王家

羅隱南園搏擊路終迷南山且灌畦敢
言逃俗態自是托幽棲葉長春松閣科

園早薤齊雨沾虛檻冷雲壓遠山低竹好還成徑桃
天亦有蹊小窻飛野馬閑覓養醢雞水石心逾遠雲

霄分已睽病憐王猛畚愚笑隗囂泥澤國潮平岨江
村柳覆堤到頭乘興是誰手好持攜蘇舜欽西施臺
下見名園百草千花特地繁欲問吳王當日事後來
桃李若為言梅摯長洲茂苑足珍材刺買前山活翠
栽客土不疎承帝力幾多臣節共安來又長洲茂苑
占幽竒巖榭珍臺入翠微園李露濃三色秀徑桃烟
暖一香飛月臨夕樹烏頻遶風揭珠簾燕未歸弭蓋
暫歡成結戀斜陽憑檻獨依依胡宿宋周元明遊南
園一遍芳菲欲滿林回塘過雨曉來深紅粧珠珮交
花影白馬春衫度柳陰向老追攀多強意隨時風物
但驚心眼前百事輸年少猶解因君放浪吟周元明
爛熳花時錦繡張無端下馬繫垂楊山亭水閣笙歌
地合與行人作醉鄉程俱王子池臺迹已荒年來華
構壓高岡長林不礙千山月老餘猶舍九夏霜便覺
平泉冠東洛還依綠水記南塘蝸
盛却喜通幽徑憤時來一嘯長

東莊

九國志謂之東墅

與南園皆廣陵王元璠帥吳時其子文

奉為衙內指揮使時所創營之三十年間極園池之
賞奇卉異木及其身見皆成合抱又累土為山亦成
巖谷晚年經度不已每燕集其間任客所適文奉跨
白騾披鶴氅緩步花逕或汎舟池中容與往來聞客
笑語就之而飲蓋好事如此

九國志吳越備史

鱸鄉亭在吳江始陳文惠公堯佐題松陵詩有秋風斜
日鱸魚鄉之句屯田郎中林肇為令乃作亭江上以

鱸鄉名之陳瓘瑩中主縣簿嘗賦詩

陳瓘鱸鄉亭中郎臺榭據江鄉雅稱

詩翁賦卒章蓴菜鱸魚好時節秋風斜日舊煙光一杯有味功名小萬事無心歲月長安得便拋塵網去

釣舟閑倚

畫欄傍

如歸亭在吳江張先子野撤而新之蔡襄君謨題壁云
蘇州吳江之瀕有亭曰如歸者隘壞不可居康定元
年知縣事祕書丞張先始為大之云

七檜堂在天慶觀之東葉參少卿嘗守吳既謝事因居
焉作此堂以佚老見其子清臣至大官餘見人物條

范仲淹詩退也天之道東南事了人風波拋舊路花
月伴閑身湖外扁舟遠門中駟馬新心從今日泰家
似昔時貧見子登西掖攜孫過北鄰白雲高閣曙綠
水後池春樽酒呼前輩爐香叩上真只應陰德在八
十富
精神

小隱堂秀野亭在城北蔣堂嘗有過葉道卿侍讀小園

詩云秀野亭連小隱堂紅蕖綠篠媚滄浪下山居士

道卿自
號也

無歸意却借吳儂作醉鄉

蘇人多游
飲於此園

隱圃在靈芝坊樞密直學士蔣堂之居堂兩守吳謝事

因家焉自號遂翁圃中有巖扃水月菴煙蘿亭風篁

亭香巖峰古井貪山等堂嘗自賦隱圃十二詠結菴

池上名水月宅南小溪上結宇十餘柱名溪館又築

南湖臺於水中皆有詩

隱圃雅得菟裘地清宜隱者心綠葵才有甲青桂漸成陰

獨曳山屐往無勞俗駕尋湛然常寂處水月一菴深
溪館年來納組去林下得身還泚泚清流處童童碧
樹間淵魚樂且靜庭鶴壽而閑粗有淮安趣誰同賦
小山○野意本自遂茲溪稱獨醒雲蘿環靜室水石
照疎樨殺竹編書古紉蘭作佩馨王通昔不偶時亦
坐汾亭南湖臺危臺竹樹間湖水伴深閑清淺林杳
徑方圓明月灣放魚隨物性載石作家山自喜歸休
早全勝賀老還賀老已八十歸六鑑湖○嶢樹水中央茲為隱
遯鄉小園香寂寂一派曉泱泱煙草碧彌岬霜桃紅
厖牆新園桃鵝夷僮居此未必入滄浪○水次揭危

亭煙隄四面平
栽蘆延宿鷺
種柳待啼鶯
雪霽清流漲
風來夜艇橫
輕肥莫臨暨
吾老懶逢迎

中隱堂在大酒巷都官負外郎分司南京龔宗元所居
取樂天詩大隱住朝市小隱入丘樊不如作中隱
隱在留司間乃作中隱堂與屯田負外郎程適太子中
允陳之奇遊從極文酒之樂皆耆德碩儒掛冠而歸
者吳人謂之三老

樂圃朱長文伯原所居在雍熙寺之西號樂圃坊圃中
有高岡清池喬松壽檜此地錢氏時號金谷朱父光

祿始得之伯原營以為圃名德所寓邦人珍之因號

其巷曰樂園坊朱自有記

樂園記大丈夫用於世則堯吾君虞吾民其膏澤流

乎天下及乎後裔與夔契並其名與周召偶其功苟不用於世則或漁或築或農或圃勞乃形逸乃心友沮溺肩綺季追嚴鄭躡陶白窮通雖殊其樂一也故不以軒冕肆其欲不以山林喪其節孔子曰樂天知命故不憂又稱顏子在陋巷不改其樂可謂至德也已余嘗以樂名圃其謂是乎始錢氏時廣陵王元璋者實守姑蘇好治林圃其屬徇其所好各因隙地而營之為臺為沼今城中遺址頗有存者吾圃亦其一也錢氏去國圃為民居更數姓矣慶歷中余家祖母吳夫人始構得之先大父與叔父或游焉或學焉每良辰美景則奉板輿以觀于此厥後稍廣西墻以益其地凡廣輪逾三十畝予嘗請營之以為先大父歸

老之地熙寧之末新築外垣盡覆之瓦方將結宇而
親年不待既孤而歸於是遂卜居焉月葺歲增今更
數載雖敝屋無華荒庭不甃而景趣質野若在巖谷
此可尚也園中有堂三楹堂側有廡所以宅親黨也
堂之南又為堂三楹命之曰遂經所以講論六藝也
遂經之東又有米廩所以容歲儲也有鶴室所以畜
鶴也有蒙齋所以教童蒙也遂經之西北隅有高岡
命之曰見山岡上有琴臺琴臺之西隅有詠齋此予
嘗拊琴賦詩於此所以名云見山岡下有池水入于
坤跨流為門水由門縈紆曲引至于岡側東為谿薄
于巽隅池中有亭曰墨池余嘗集百氏妙迹於此而
展玩也池畔有亭曰筆谿其清可以濯筆谿傍有釣
渚其靜可以垂綸也釣渚與遂經堂相直焉有三橋
度谿而南出者謂之招隱絕池至于墨池亭者謂之
幽興循岡北走度水至于西園者謂之西礀西園有
草堂草堂之後有華嚴庵草堂西南有土而高者謂

之西丘其木則松檜梧栢黃楊冬青椅桐檉柳之類
柯葉相蟠與風颺颺高或參雲大或合抱或直如繩
或曲如接或蔓如附或偃如傲或參如鼎足或並如
釵股或圓如蓋或深如幄或如蛻虬卧或如驚蛇走
名不可以盡記狀不可以殫書也雖雪霜之所摧壓
颺霆之所擊撼槎牙推折而氣象未衰其花卉則春
繁秋孤冬暉夏倩珍藤幽藹高下相映蘭菊倚倚蕪
葭蒼蒼碧蘚覆岍慈筠列砌藥錄所收雅記所名得
之不為不多桑柘可蠶麻紵可緝時果分蹊嘉蔬滿
畦標梅沈李剝瓜斷壺以娛賓友以約親屬此其所
有也予於此圃朝則誦義文之易孔氏之春秋索詩
書之精微明禮樂之度數夕則泛覽羣史歷觀百氏
考古人是非正前史得失當其暇也曳杖逍遙陟高
臨深飛翰不驚皓鶴前引揭厲于淺流躊躇于平臯
種木灌園寒耕暑耘雖三事之位萬鍾之祿不足以
易吾樂也然余觀羣動無一物非空者安用拘於此

以自贊耶異日子春之疾瘳尚平之累遣將扁舟桴
海浮游山岳莫知其所終極雖然此園者吾先光祿
之所遺吾致力於此者久矣豈能忘情哉凡吾衆弟
若子若孫尚克守之母顏爾居毋伐爾林學於斯食
於斯是亦足以為樂矣予豈能獨樂哉昔戴顒寓居
魯望歸隱遺迹迄今猶存千載之後吳人猶當指此
相告曰此朱氏之故園也元豐

三年十二月朔吳郡朱伯原記

紅梅閣在小市橋天聖中殿中丞吳感所居吳有姬曰

紅梅因以名閣又作折紅梅詞傳於一時蔣堂亦有

吳殿丞新葺兩圃詩有深鑱煙光在樓閣旋移春色

入門牆之句吳死閣為林少卿家所得

三瑞堂在閭門之西楓橋孝子姚淳所居家世業儒以孝稱蘇文忠公往來必訪之嘗為賦三瑞堂詩姚氏致香為獻公不受以書抵虎丘通長老云姚君篤善好事其意極可嘉然不須以物見遺惠香八十罐却託還之已領其厚意實為他相識所惠皆不留故也

蘇軾詩君不見董召南隱居行義孝且慈天公亦恐無人知故令雞狗相哺兒又令韓老為作詩爾來三百年名與淮水東南馳此人世不乏此事亦時有楓橋三瑞皆目見天意宛在虞鰥後惟有此詩非昔人君更往求無價手

五柳堂胡稷言所居在臨頓里陸龜蒙之舊址也

如村胡嶧所居嶧父稷言作五柳堂至嶧又取老杜宅舍如荒村之句名其居曰如村

范家園在雍熙寺後范周無外所居

逸野堂在崑山老儒王僖所居僖累試不利以讀書自娛教其姪孫葆為名儒至今此堂為邑人所稱

醉眠亭在松江李無晦所居李本湖人徙居松江高尚不仕以詩酒自娛治園亭號醉眠

漫莊在毗村處士顧禧所居禧棄官高隱讀書以老鄉

人貴重之後其居有名

章憲何詳明人眼松間見古堂泉聲到葉几山影覆繩牀

愛酒陶元亮聽蛙孔德璋
紛紛戰蠻觸丘壑信難忘

蝸廬在城北中書舍人程俱致道所居俱政和間自監

舒州茶場上書論時政不合來家於吳葺小屋號蝸

廬中有常寂光室勝義齋嘗賦遷居蝸廬詩及蝸廬

後隙地種植竹菊鳳仙雞冠紅莧芭蕉水青等七詠

遷居蝸廬有舍僅容膝有門不容車囊中孰非寄是
豈真吾廬不作大耳兒閉闕種園蔬茅簷接環堵無

地可濯鋤不作下榻翁一室謝掃除平生四海志投
老河魚枯願從素心人不減南村居蕭然冰炭外傲
睨萬物初生視蠻觸戰無忘糟粕書聊呼赤松子伴
我龜腸虛又葺蝸廬吳下四海無廬著此翁故營松
竹儘囊空明知計出柏馬下正擬身全木鴈中東郭
易成生草舍南村先怯卷茅風向來豪氣今如此敢
與元龍
較長雄

復軒在吳縣之黃村處士章憲自作記謂葺先人之廬
治東廡之軒以貯經史百氏之書名之曰復以警其
學其後圃又有清曠堂詠歸清閔遐觀三亭以慕古

尚賢各有詩

復軒記其歌云洞視兮八荒了無物兮
往無旁往古來今兮無際起復代謝兮

不失吾常復乎復乎吾所寓兮廣莫之野而無何有
之鄉清曠堂吾慕仲公理卜居樂清曠茲焉憇吾願
名堂以自況我無適俗韻且乏食肉相何許寄吾生
棲遲翳窮巷境幽有經行心遠無得喪從容大化中
信是義皇上詠歸亭吾慕曾夫子舍瑟言所志所志
則非邦獨契聖者意暮春春服成從我才一二風乎
林岫間所樂有餘味邈矣千載上神交得冥契當知
結駟非不易窮閭是清閑吾慕韓昌黎文章妙百世
體物語尤工賦竹誇清閑唯我獨好之則亦有深意
虛中可受道貫時無險易復若魏文貞直節而嫵媚
伊余清閨中賞玩有遺味遐觀亭吾慕陶靖節處約
而平寬涉園自成趣矯首復遐觀我亦散遊目俛仰
天地間雲煙自舒卷湖嶺相回環永與形役
謝豈有俗慮干想像斜川遊千載乃相關

臞菴在松江之濱邑人王份有超俗趣營此以居園江

湖以八圍故多柳塘花嶼景物秀野名聞四方一時
名勝喜遊之皆為題詩圃中有與閑平遠種德及山
堂四堂煙雨觀橫秋閣凌風臺鬱哉城釣雪灘琉璃
沼臞翁澗竹廳龜巢雲闕纈林楓林等處而浮天閣
為第一總謂之臞菴份字文孺以特恩補官嘗為大
治令歸休老焉題詩甚多不可悉錄錄其尤著於此

俾其家世保焉

徐作開菴藜莧幽人室丘園隱者居
一原青障合萬木綠陰疎手把歸田

賦腰懸種樹書桑麻連畛秀網罟入溪漁蒙與義一
島風煙水四圍軒亭窈窕更幽奇眼中泉石論溪買

行處壺觴逐境移勸馬虺隤前日路寒松偃蹇舊年
枝自嗟老去殊癡絕一月春愁廢作詩呂本中伊洛
富山水家有五畝園花竹遶渥澗不讓桃花源清時
足真賞戶門開層軒一朝烽烟起故家希復存莽蒼
走萬里始及吳市門廬據形勝冰壺貯乾坤亭榭
着仍穩不見斧鑿痕主人更超邁雲夢八九吞植杖
邀我坐笑語清而溫坐令車馬客稍識山林尊十年
老朝市漸見兩目昏求田與問舍姑置不復論但願
從我公不使世諦渾蘇庠王郎臞菴摩詰詩煙花繞
舍江繞籬石渠東觀了無夢筆牀茶竈行相期古人
已往不可作甫里顧有今天隨東鄰蟹舍肯着我請
辦蓑笠懸牛衣浮天閣臞菴主人天與閑回欄飛閣
臨滄灣晴波渺渺鴈行落坐見萬頃穿雲還百年有
底付鳥翼未暇著脚鴛鴦間徑須呼酒澆磊磊莫遣
暝色霾煙鬢○玉蟾飛入水晶宮萬頃琉璃碎晚風
詩就雲歸不知處斷山零落有無中○秋落空江動

碧虛黃蘆洲渚鴈飛初我來欲訪鷗夷子為掛西風
十幅蒲平遠堂柳外西風六幅蒲野塘睡鴨對春鉏
如何喚得王摩詰畫作江南煙雨圖○寒蘆浙浙催
秋晚浦雨溟溟憶去年它日未埋黃土陌為君重賦
補亡篇草堂笛卧松江明月蓑披笠澤歸雲若道青
霄快活王侯何事如君王鉉全家高隱白雲闕事不
縈懷夢亦閑欵乃交撐漁市散隔江城郭是人間向
子諲仙翁五十鬢猶青高卧柴門畫亦扁茅舍已忘
鍾鼎夢蒲輪休過薜蘿亭陰森門巷先生柳寂寞江
天處士星晚歲田家農事了閑抄甯戚相牛經沈與
求地控三州界池開十大蓮桑麻無杜曲松菊有斜
川別浦歸帆遠他山晚照妍江湖春水闊幽興白鷗
前程子山待月凝雲闕垂竿釣雪灘虛窻搖冷翠傑
閣聳高寒籠養千齡鶴爐燒九轉丹不須論許事心
目自清安○壁上煙蘿子窻前鴻素書短籬開窈窕
嫩竹轉扶疎世事霜前葉聲名澗底樗柴桑陶靖節

日暮荷歸鋤何偁多羨王居士心閑事事幽山從天
末見江近枕邊流春圃千葩秀霜林百果收更能窮
物理濠上看魚游○地占松江勝為園不種瓜幽深
清磬響高下石欄斜花密蜂隨蝶林深雀啁蛇勝如
摩詰畫不是季鷹家○柳外長虹卧江邊小市圓水
搖千嶂影窻納五湖天隔岸誰家園開帆何處船非
闌臺榭好此地最堪憐○霜落川原淡風高木葉丹
雲垂千頃白月墮一江寒禮佛因成塔焚香旋築壇
竹聲過小院雜珮響珊珊○沙暖鴛鴦困江寒翡翠
愁紅蓮秋的歷短檣晚夷猶處世長無累端居百不
憂時時明月下橫笛倒騎牛僧道舉竹裏蓬茅掩棘
扉主人詩瘦帶寬圍種成首宿先生飯製就芙蓉隱
者衣柳絮春江魚婢至荻花秋渚鴈奴歸小溪短艇
能容我先向溪隈築釣磯○谿南谿北繞清漪舍後
舍前圍短籬九九筭來成底夢休休歸去復何疑添
丁見客走賒酒阿買能書供賦詩丘壑政非公子事

綺紈當預少年知李彌正和祝鑑韻勞車發危坂勸
艘失飛端滔滔襟襪子疾走殊未閑鷓仙擺名宦結
廬松江干笑拍萍風浮瞬視草露溥圖川不愧輞序
谷寧先盤門豈俗駕拒室無哀箏彈按行松菊間澹
然有餘歡蓮巢衆香聚浮天百憂寬秋光斂洲渚暮
翠籠峰巒我來挾良朋道故盟未寒練顏仰孤標耐
久同蒼官終當役薪水刀圭却衰殘陳枵李鷹雅志
本江湖胡為入洛誠計疎一杯尊羹入歸夢歲晚僅
飽松江鱸何如王郎十畝宅一生江頭枕江碧西風
落日弄煙波却笑陶朱計然策我來訪君春已深江
花江柳翻綠陰相攜三徑拾瑤草為問客來何苦心
固知此事君計得我被微官苦相逼勸君謹勿語彈
冠便恐紛紛北山檄沈括清江繞檻白鷗飛坐看潮
痕上釣磯松菊未荒元亮徑芰荷先製屈平衣窻前
楓葉曉初落亭下鱸魚秋正肥安
得從君理蓑笠權歌相趣入煙霏

樂菴在崑山縣東六里圓明村侍御史李衡彥平歸老
所居衡本江都人避地居崑山志氣卓犖不羣學問
通性理登第後治縣有聲召對累遷樞密院檢詳諸
房文字出典大藩俄引年而歸作此菴以經史圖畫
自娛歲餘落致仕以侍御史同知貢舉復告老年幾
八十起居不衰時過諸子於邑中已復還菴清脩絕
俗給事惟一蒼頭俄旬餘不食謝去醫藥手書數十
紙徧別親舊勅其子不得隨俗作佛事書訖掩戶蕭

然而化其家刻其遺書總一大軸士大夫宗敬之

范文正公義宅在雍熙寺後

錢公輔謨范文正公蘇人也平生記范文正公蘇人也平生

好施與擇其親而貧疎而賢者咸施之方貴顯時於其里中買負郭常稔之田千畝號曰義田以養濟羣族族之人日有食歲有衣嫁娶凶葬皆有贍擇族之長而賢者一人主其計而時其出納焉日食人米一升歲衣人一縑嫁女者錢五十千娶婦者二十千再嫁者三十千再娶者十五千葬者以再嫁之數葬幼者十族之聚者九十口歲入粳稻八百斛以其所入給其所聚沛然有餘而無窮仕而家居俟代者預焉仕而之官者罷其給此其大較也初公之未貴顯也嘗有志於是矣而力未逮者二十年既而為西帥以至於參大政於是始有祿賜之入而終其志公既歿後世子孫至今修其業承其志如公存也公雖

位高祿重而貧終其身歿之日身無以為斂子無以
為喪唯以施貧活族之仁遺其子而已昔晏平仲弊
車羸馬以朝陳桓子觴之曰君位之上卿祿之百萬
而弊車羸馬是隱君之賜也晏子曰自臣之貴父之
族無不乘車者母之族無不足於衣食者妻之族無
凍餒者齊國之士待臣而舉火者三百餘家如此為
隱君之賜乎彰君之賜乎於是齊侯以晏子之觴而
觴桓子子嘗愛晏子好仁齊侯知賢而桓子服義也
又愛晏子之仁有等級而言有次序也先父族次母
族次妻族而後及其疎遠之賢孟子曰親親而仁民
仁民而愛物晏子為近之今觀文正公之義其與晏
子比肩矣然晏子之仁止於生前而公之義垂於身
後其規模遠舉又疑其過之嗟乎世之人都三公位
享萬鍾祿其邸第之雄與馬之盛聲色之侈妻孥之
富止乎一已而族之人不得其門而入者豈少哉況
於施賢乎其下為卿為大夫為士而廩稍之充奉養

之厚足乎一已而族之人操瓢為溝中瘠者又豈少哉況於賙人乎是皆文正公之罪人也公之忠義滿朝廷事業滿邊陲功名滿天下後必有良史書之者予可無書也獨書其義田以警於世云義宅記吳門范氏自唐柱國麗水府君居於靈芝坊今在雍熙佛寺之後五世孫文正公少長北地皇祐中守杭始至故鄉訪求宗族買田千畝作義莊以贍之宅有二松名堂以歲寒閣曰松風因廣其居以為義宅聚族其中義莊之收亦在焉中更兵燬族黨星散故基榛蕪編民募據為居宇為場圃儼直無幾甚失初意粟無所儲寓於天平山墳寺倍有往來給散之勞尋復圯廢改寘城中及寄他舍病此久矣自公長子監簿而下又五世而至良器一日謂二弟曰先君奉議念此有年齋志而歿吾儕當有以振起之慨然自任思圖其新於是厯告居民盡除儼直約期而遣之不服者訴于郡于監司以至上達臺省提刑臨川何公異太

守四明鄭公若容咸義此舉力為主張由是悉得故地周一千四百八十丈首捐私帑繚以垣牆創建一堂仍扁歲寒以祠文正結屋十楹以處貧族就立新倉寢復舊觀庀役於慶元二年之季夏中秋告成不愆于素觀者無不歎息親掌出納一年以為後式選族子之廉謹者二人繼之詳具要束以補舊規揭于堂上田籍之傳遠者俱刻之石以為永久之計介弟之桑續世科於百二十有四載之後尤勇於義既力贊其兄謀之屬鑰為記始末鑰不佞先祖少師收卹宗族有意於此而歲不與伯父揚州始為之雖不及文正公之盛而寒宗之貧者賴以自給亦四十餘年于茲先工部欲附益之清貧終身猶未果也見范氏家法為之媿歎是舉也衍文正公累世之遺澤伸先奉議九原之餘恨又以綿范氏無窮之休豈不偉哉嗚呼文正公奮身孤藐未嘗賴宗人毫髮之力既達則闔族受解衣推食之恩天佑范氏三子鼎貴皆以

宏才高誼上繼父風後人得維持憑藉以保其家良
器一布衣而決意興起不惟義宅載新義莊亦復整
飭剔蠹省費又為數世之利用心如此後其興乎鳴
呼文正初立規矩止具給予之目僅設預先支請之
禁不數年忠宣公已慮其廢壞故治平奏請聖旨違
犯義莊規矩之人許令官司受理又與右丞侍郎自
熙寧以至政和隨事立規闕防益密今之規約又加
密矣一門同姓為此義事其難如此況天下之大思
所以為億萬世之計者又可忽乎嗚呼衣冠之族不
免饑寒者甚眾願如范氏之宗派而不可得今坐享
飽暖者幾人若人人如良器用心更相扶持以永其
傳則善矣若曰是我所當得者而不思所自來甚者
反為蠹於其間則文正諸公實臨之其聞於有司曰
公元者蓋今之族長云三年立秋顯謨閣直學士太
中大夫提舉江州太平興國宮奉化
縣開國男食邑三百戶樓鑰記并書

吳郡志卷十四

欽定四庫全書

史部

吳郡志卷十五至

詳校官監察御史_臣沈孫璉

檢討_臣德生覆勘

總校官編修_臣倉聖脈

校對官助教_臣卜維吉

謄錄監生_臣陸潮愈

欽定四庫全書

吳郡志卷十五

宋 范成大 撰

山

姑蘇山一名姑胥一名姑餘連橫山之北古臺在其上
靈巖山即古石鼓山又名硯石山董監吳地記案郡國
志曰吳山離宮在石鼓山越王獻西施於此山山有
石馬望之如人騎南有石鼓鳴即兵起亦名硯石山
又有琴臺在其上越絕書云吳人於硯石山作館娃

宮劉達注吳都賦引楊雄方言云吳有館娃宮吳人
呼美女為娃故三都賦云幸於館娃之宮張女樂而
娛羣臣今吳縣有館娃鄉又云硯石山有石城去姑
蘇山十里闔閭養越美人於此上有兩湖湖中有萼
充貢按此即今靈巖山以上皆董監所記今按吳越
春秋吳地記等書云闔閭城西有山號硯石山高三
百六十丈去人烟三里有吳縣西三十里有吳館
娃宮琴臺響屨廊山上有西施洞硯池翫月池山頂

之池有葵蕤夏能去熱秋則去寒吳中每年曝乾供
進其池至旱不竭葵蕤今不復採琴臺下有大偃松
身卧於地兩頭崛起交蔭如蓋不見根之所自出吳
人以為奇賞比年雷震一枝已瘁山下平瞰太湖及
洞庭兩山滴翠叢碧在白銀世界中亦宇內絕景山
前十里有採香徑斜橫如卧箭云梁天監中始置秀
峰寺今為顯親崇報禪院餘在寺門

天平山在吳縣西二十里此山在吳中最高聳

一峰端正特立續圖經以為吳鎮不誣也山皆奇石
卓筆峰為最山半白雲泉亦為吳中第一水比年有
寺僧師壽搜採巖巒別立數亭皆奇峭又於白雲之

上石壁中得一泉如綫尤清冽云

蘇舜欽吳會枯泉
山貳貳不可數其

間號天平突兀為之主傑然鎮西南羣嶺爭拱輔吾
知造物意必以屏大府清溪至峰前仰視勢飛舞偉
石如長人肅立欲言路捫蘿緣險磴爛漫松石古中
腰有危亭前對翠壁舉石竇進玉泉泠泠四時雨源
生白雲間顏色若粉乳旱年或播灑潤可足九土柰
何但澄徹未為應龍取予方棄塵中巖壑素自許盤
桓擇勝處至此快心膂養內聊自清終勝甘於虎范
師道萬物天地間或有奇勝迹見賞能幾人不止今

與昔吳門多好山天平為峻極旦暮常白雲表裏皆
珍石烟嵐十里光松桂四時色我因一縱遊煩襟為
開釋感古懷君子翻然長太息樂天賞雲泉詩章何
厯厯垂今數百年繼者漠然寂間遇希文來雙旌守
鄉國行春三讓原吟哦盡所得子美天與才尋幽多
採撫賦百五十言平地黃金擲三賢固有名山亦資
輝赫比去還幾年不逢好事客楊備久厭城居適野
情措筇屨傍山行人間多少嶮巇路縱是天平還
不平

香山胥口相直吳王種香於此山遣美人採香焉傍有
山溪名採香逕事具古蹟門

胥山在太湖之口吳王殺子胥于江吳人立祠江上因

名胥山詳具辨證門

穹窿山吳中山最高深處赤松子取赤石脂於此神仙傳赤松子秦穆公魚吏也食桂實石脂絕穀後於吳山升仙去吳都賦云赤松蟬蛻而附麗此有寺名福

臻

楊備穹窿山吳郡名山第一山翠微心在碧霄間林泉瀟洒烟嵐秀直擬結廬終老閑

華山在吳縣西六十三里老子枕中記云吳西界有華山可以度難父老云山頂北有池上生千葉蓮華服之羽化因曰華山長林森天荒楚蔽日輿地志云山

上有石鼓晉隆安中鳴乃有孫恩之亂比年有土人

張氏買此山以葬開鑿巖石甚奇勝山半有大壑曰

天池最佳處也

華山精舍記楊備詩巖屏晚樹噪寒
鵝嵐翠樓臺輝子家池面鏡光功德

水金波影
裏石蓮花

洞庭包山即洞庭山也傳記所載多與洞庭相雜吳地
記云在縣西一百三十里中有洞庭深遠世莫能測

吳王使靈威丈人入洞穴十七日不能盡因得禹書

郡國志洞庭山有宮五門東通林屋西達峨眉南接

羅浮北連岱嶽東有石樓樓下兩石扣之清越所謂
神鉦昔有青童乘獨颺飛輪之車相傳至此其跡上
有天帝壇山山有金牛穴吳孫權令人掘金金化為
牛走上山其跡存焉吳王闔閭作水精宮於此尤極
水府之珍怪玄中記云吳國西有具區澤中包山有
洞庭入地下潛行通琅邪東武山淮南子云斷修蛇於
洞庭左傳云哀公元年夫差敗越於夫椒今太湖東
別有夫椒山下有大洞天宮潛通五岳又云包山上

舊無三班謂蛇虎雉侯景亂後乃有虎蛇五符云林
屋山一名包山在太湖中下有洞潛通天岳號天后
別宮夏禹治水平後藏五符於此吳王闔閭使靈威
丈人入山所得是也真誥云包山下有石室銀房圍
百里又有白芝隱泉其水紫色玄中記云吳國西有
具區中有包山洞庭地下潛通琅邪東武山山穴道
一名椒山哀公九年越敗吳夫差于夫椒即此是又
名洞庭山吳大帝時使人行二十餘里而返云上聞

波浪聲有大蝙蝠如鳥拂殺火穴中高處照不見顛
左右多有道人馬跡禹治水過會稽夢人衣玄纁告
治水法在此山北錮函中并不死方禹得藏於包山
石室吳人得之不曉問孔子云王居殿赤烏銜集庭
此何文字曰此禹石函文也玄中記又曰吳西具區
澤中包山有洞庭室戰國策曰越王散卒三千擒夫
差於干隧吳郡西北有地名干隧是也句曲山聞有
靈府洞庭四開古人謂為天壇之靈區天后之便闕

清虛之東牕林屋之隔皆衆洞相通七塗九便四方
交達天后者林屋洞中之真君住在太湖包山下靈
威丈人所入得靈寶符處也又云包山下有石室銀
戶方圓百里中有白芝亦名林屋山今洞庭山在太
湖湖中有東西二山西山最廣林屋洞及諸故物悉
在焉東山有柳毅井為故跡房琯云不遊興德洞庭
未見山水興德杭州寺也洞庭景物互見太湖門

皮日

休雨中遊包山精舍松門亘五里彩翠高下絢幽人
共躋攀勝事頗清便霎霎林上雨隱隱湖中電辟帶

欽定四庫全書

卷十五

輕束腰荷笠低遮面濕屨黏烟霧穿衣落霜霰笑次
度巖壑困中遇臺殿老僧三四人梵宇十數卷地稀
無夏屋境僻乏朝膳散髮抵泉流支頤數雲片坐石
忽忘記捫蘿不知倦異蜨時似錦幽禽或如鈿葉萼
還戛刃耕欄自搖扇俗態既斗藪野情空眷戀道人
摘芝菌為余備午饌渴興石榴羹飢慙胡麻飯如何
事于役茲遊急于傳却將塵土衣一任瀑絲濺陸龜
蒙包山信神仙主者上真職及棲鍾梵侶又是清涼
域乃知煙霞地絕俗無不得巖開一逕分柏擁深殿
黑僧閒若圖畫像古非彫刻海客施明珠湘麤料
淨食有魚皆玉尾有鳥盡金臆手攜鞞鐸佉楊枝若
在中印國十峯殘雨過萬籟清且極此時空寂心可
以遣智識知君戰求勝尚倚功名力
却下聽經徒聽生公石有孤帆有行色

林屋館即洞庭前代盖有宮館非令龍宇處也

陳沈炯
林屋館

銘夫玄之又玄處衆妙之極可乎不可成道行之致
斯蓋寂寥窅冥希微恍惚故非淮南八仙之圖賴卿
九井之記至若崑山平圃銀榜相暉蓬閣仙宮金臺
崛起南瞰胥臺傍連飛閣桂柱瓊軒闕雲瑞銘曰
大道既隱衆聖無門悠悠太極誰見玄根祈年立泰
望仙表漢髣髴神靈依稀官觀我我林屋輪奐徘徊
庭羅花鳥室靜塵埃皮日休縹緲峯頭戴華陽帽手
拄大夏筇清晨陪道侶來上縹緲峯帶露嗅藥蔓和
雲尋鹿蹤時驚鮑鼯鼠飛上千丈松翠碧內有室叩
之虛碕磬下音隆反古穴下徹海視之寒鴻濛遇歇
有佳思緣危無倦容須臾到絕頂似鳥穿樊籠恐足
蹈海日疑身凌天風衆岫點巨浸四方接圓穹似將
青螺髻撒在明月中片白作越分孤嵐為吳宮一陣
靉靄氣隱隱生湖東激雷與波起狂電將日紅靨靨
雨點大金鷄轟下空暴光隔雲閃髣髴亘天龍連拳
百丈尾下拔湖之洪梓為一雲山欲與昭回通移時

欽定四庫全書

卷十五

却掘下細碎衡與崧神物諒不測絕景尤難窮杖策
下反照漸聞仙觀鐘煙波噴肌骨雲壑聞心胃竟死
愛未足當生且歡逢不然把天爵自拜太湖公陸龜
蒙左右皆跳岑孤峯挺然起因思縹緲稱乃在虛無
裏清晨躋磴道便是孱顏始據石即更歌遇泉還徙
倚花奇忽如薦樹曲渾成几樂靜煙靄知忘機猿犬
喜頻攀峻過斗末造平如砥舉首闕青冥迴眸聊下
眎高帆大於鳥廣墀纔纔類蟻就此微茫中爭先未
嘗已葛洪話剛氣去地四十里苟能乘之遊止若道
路耳吾將自峯頂便可朝帝宸盡欲活羣生不唯私
一已超騎明月蟾復弄華星蘂却下蓬萊巔重窺清
淺水身為大塊客自號天隨于他日向華陽敲雲問
名氏皮日休桃花塢黃緣度南嶺盡日穿林樾窮深
到茲塢逸興轉超忽塢名雖然在不見桃花發恐是
武陵溪自閉仙日月倚峯小精舍當巔殘耕垓將洞
任迴環把雲恣披拂閑禽啼叫窳險狹眠碑碣微風

吹重嵐碧埃輕勃勃清陰減鶴睡秀色治人渴敲竹
鬬錚擬弄泉爭咽嗚空齋蒸柏葉野飯調石髮空羨
塢中人終身無履戰陸龜蒙行行問絕境貴與名相
觀空經桃花塢不見秦時人願此為東風吹起枝上
春願此作流水潛浮藥中塵願此為好鳥得棲花際
鄰願此作幽蝶得隨花下賓朝為照花日暮作涵花
津試為探花士出作偷桃臣桃源不我棄庶可全天
真張祜洞庭南館詩一選逗霜林朱欄遠碧岑地盤
雲夢角山鎮洞庭心樹白看烟起沙紅見日沈還因
此悲屈惆悵又行吟白居易早發洞庭閭門曙色欲
蒼蒼星月高低宿水光棹舉影搖燈燭動舟移聲拽
管絃長漸看梅樹紅生日遙見包山白帶霜出郭已
行十五里惟消一曲慢霓裳又洞庭小湖湖山上頭
別有湖艾荷香氣占仙都夜含星斗分乾象曉映雷
雲作畫圖風動綠蘋天上浪鳥棲寒照月中鳥若非
神物多靈迹爭得長年冬不枯方干早發洞庭長天

接廣澤二氣共含秋舉目無平地何心戀直鈞孤鐘
鳴大岬片月落中流却憶鴟夷子當時此泛舟皮日
休入林屋洞齋心已三日筋骨如烟輕腰下佩金獸
手中持火鈴幽塘四百里中有日月精連亘三十六
各各為玉京自非心至誠必被神物烹顧余慕大道
不能惜微生遂招放曠侶同作幽憂行其門纔函丈
初若盤薄硎洞氣黑眈眈苔蘚紅鬢鬢試足值坎窞
低頭避崢嶸攀緣不知倦怪異焉敢驚匍匐一百步
稍稍策可橫忽馬白蝙蝠來撲松炬明人語散瀕洞
石響高玲玎脚底龍蛇氣頭上波浪聲有時若服匿
偈仄如見繡俄爾造平淡豁然逢光晶金堂似鑄出
玉座如琢成前有方丈治凝碧融人情雲漿湛不動
瑤露涵而馨漱之恐減筭酌之必延齡愁為三官責
不敢攜一甌昔云夏后氏於此藏真經刻之以紫琳
祕之以丹瓊期之以萬祀守之以百靈焉得彼丈人
竊之不加刑石匱一以出左神俄不局禹書既云得

吳國由是傾蘇繾綣半尺中有怪物腥欲去既噉
將迴又伶俜却遵舊時道半日出杳冥屢泥黠惹石
髓衣濕沾雲英玄籙乏仙骨青文無降名雖然入陰
宮不得朝上清對彼神仙窟自厭濁俗形却怪造物
者遣我騎文星陸龜蒙知名十小天林屋當第九
三十六洞天出洞九微志未行于世題之以左神理以
天后天林屋洞為左神虛之魁堆僻邪輩左右專備
守自非方瞳人不取窺洞口唯君好奇士復嘯忘情
友致傘在風林低冠入雲竇中深劇苔井傍坎纔藥
臼石角忽支頤藤根時束肘初為大幽怖漸見微明
誘屹若造靈封森如達仙藪嘗聞白芝秀狀與琅花
偶又坐紫泉光甘如酌天酒白芝紫泉皆洞所出
得能何人能挹嚼餌以代漿糗却笑探五符徒勞步
雙斗真君不可見焚盥空遲久春戀玉碣文行行但
迴首王禹偁洞庭山吳山無此秀乘暇一遊之萬頃
湖光裏千家橘熟時平看月上早遠覺鳥歸遲近古

誰真賞白雲應得知李彌大遊洞庭山昔白樂天為
姑蘇太守遊洞庭山題詩翠峰寺有笙歌畫舟之句
紹興壬子彌大守平江閱月而罷片帆來遊首訪翠
峯追懷古昔擬樂天體聊繼其韻時異事別各遂所
適之樂爾詩云山浮羣玉碧空沈萬頃光涵幾許深
梵剎樓臺噓蜃海蜃洞天日月浴丹金秋林結綠留連
賞春塢藏紅次第吟擬泛一
舟追范蠡從來世味不關心

崧裏傍龜山下有良田二十頃

皮日休崧裏崧裏何幽
奇膏腴二十頃風吹稻

花香直過龜山頂青苗細膩卧白羽悠溶靜塍畔起
鷗鷺田中通舴艋幾家傍潭洞孤戍當林嶺罷釣時
煮菱停綠或焙茗峭然八十老生計於此永苦力供
征賦怡顏過朝暝洞庭取異事包山極幽景念爾飽
得知亦是遺民幸陸龜蒙山橫路若絕轉櫂逢平川
川中水木幽高下兼良田溝塍墮微溜桑柘含疎烟

處處倚蠶箔家家下漁筌
駢犢卧新莪野禽爭折蓮
試拈搔首翁共語殘陽邊
今來九州內未得皆恬然
賊陣始吉語狂波又凶年
吾翁欲何道守此常安眠
笑我掉頭去蘆中聞刺船
余知隱地術可以齊真仙
終當從之遊
庶復全於天

石板在石公山前

皮日休翠石數百步如板漂不流空
疑水妃意浮出青玉洲中若瑩龍劍

外唯疊蛇矛狂波忽然死浩氣清且浮
似將翠黛色抹破太湖秋安得三五夕
攜酒棹扁舟召取月夫人嘯歌於上頭
又恐霄景闊虛皇拜仙侯欲建九錫碑
當立十二樓瓊文忽然下石板誰能留
此事少知者唯應波上鷗陸龜蒙一片
倒山屏何時隳洞門屹然空闊中萬古
波濤痕我意上帝命持來歷泉源恐為
庚辰官囚怪力所掀又疑廣袤次零亂
旋驚奔不然遭霹靂強半沈無垠如何
造化手便截秋雲根往事

不足問奇蹤安可論吾今病煩暑據筆常昏昏欲從
石公乞公石板前在石瑩理平如瑞前後植桂檜東西置

琴樽盡攜天壤
徒浩唱義皇言

龜頭山一名龜山在洞庭西山之東麓有石闢出如龜

首相傳以名一山皆青石溫潤光瑩扣之琅琅有金

玉聲浙西碑石與壓砌緣池皆取此石而出不知其

數山如剝皮矣舊有神女祠

韋應物龜頭山神女歌
龜頭之山直上洞庭連

青天蒼蒼煙樹閑古廟中有蛾眉成水仙水府沈沈
行路絕蛟龍出沒無時節魂同魍魎潛太陰身與空
山長不減東晉永和今幾代雲髮素顏猶眇眇陰沈
靈氣靜凝美的皖龍綃雜瓊珮山精水魅不敢親昏

明響像如有人蕙蘭瓊茅積煙露碧窻松月無冬春
舟客經過莫椒醑巫女南音歌楚些碧水冥冥空鳥
飛長天何處雲隨雨紅蕖綠蘋芳意多玉靈蕩漾凌
清波孤峯絕島儼相向鬼嘯猿鳴垂女蘿皓雪瓊枝
殊異色北方絕代徒傾國雲沒烟消不可期明堂翡
翠無人得精靈變態狀無方游龍宛轉驚鴻翔湘妃
獨立九疑暮漢女菱歌春日長始知仙事無不有可
惜吳宮空白首

禹期山在太湖中舊說禹導吳江以洩具區會諸侯於
此

思夫山在太湖中舊說秦有逸人居此採藥不回妻念
之而死後人哀之以名山

踞湖山即橫山也在城西南十五里以其背臨太湖若箕踞之勢然錢氏有國日造寺於山下曰薦福寺至今里人不以踞湖名山或以寺名名之山有五大塢圖經又名五塢山五塢舊名不雅皇祐五年節度推官馬雲三遊此山求其林澗之美峰壑之秀雲景之麗泉石之怪因其物象各以美名名五塢踞湖即總五塢之衆名為六題焉

踞湖山山臨太湖上寺隱青蘿間五塢洞壑邃衆峯屏障

環濃嵐面光彩驚波背潺湲雲歸定僧寂月伴樵夫還林墅掩蒙密級磴容躋攀錢氏建圭社此地為家

山芳桂塢森森芳桂樹團團削青玉春花飛澗戶秋
實墜巖曲霜條封翠紫風葉搖香綠下有幽棲人結
芳避世俗學仙讀丹經好道探藥錄植根滿羣峰不
使樵斧觸所觸居也飛泉塢高岵落飛泉深源味冷冽
雲津留玉乳石髓澄金屑淙淙危磴響滴滴蒼蘚缺
濺沫灑明珠滿澗融寒雪岩夫就漱飲姬子臨沆瀣
不獨愈痼疾自可清內熱脩竹塢檀藥徧岩川幽谷
氣象鮮風玉自宮徵秋籟成管絃夕靄起碧霧晨曦
生綠煙花繁紫鳳飽質勁蒼虬攀藤蘿交密蔭仰不
見雲天欲訪桃源路塢塢疑相連丹霞塢東澗岩谷
秀杲然金碧麗亘野丹氣明向曙霏烟霽磴瀉紅玉
泉林綺赤鳳髻日出諸峯上月皎半天際幽谷紆絳
繒層岵榮錦綉羨此山居人蕭然遠塵世白雲塢君
尋白雲塢最近林澗西永日抱幽石因風度清溪炎
隨夏景變涼高秋氣淒素靄生巘嶸練光帶虹霓潤
澤施天下還返故山棲深惟賢士志出處可與齊訪

踞湖山人仇君隱居雞犬眠雲白日空暮春花木滿
川紅茶甌香沸松林火藥杵聲清石澗風玉帛未聞
招處士神仙今喜識臺翁夕陽
半局殘碁在醉倚岩邊紫桂叢

秦餘杭山即陽山也越入吳夫差晝夜馳走達於秦餘
杭飢得生稻而食之曰是公孫聖所言不得火食走
僂惶耶呼公孫聖三呼三應夫差大懼有頃越兵大
至遂擒之

鯀山吳王旦食於鯀即此山

東獄西獄二山在太湖中吳王於此置男女二獄

楊備
雷霆

號令雪霜威二獄東西鎖翠微髣髴
髯鄴都叢棘地岩扉應是古園扉

栗山一名新石頭山上有飛泉石松有吳先主刻題處

石杵西有金古於山採金劉道真記云縣西有名山

絕頂之上有石甑一人搖輒動與千人不異

吳地記

會骸山相傳帶海有此山傳有金牛昔有兄弟三人共

鑿求之坎崩同死因以會骸為名

吳郡緣海四縣記

虞山在常熟縣海虞縣西六里有虞山上有仲雍塚海

虞即常熟也

陸道瞻吳郡記

鶴阜山亦名峯寧山世傳禹治水時令童男童女入太湖引出此山欲以填水至鶴邑墟不肯進因此以名或云即師子山也

胥女山在白石山

小雞山在震澤西出胥門西行四十里過光福市市西五里土山也陸龜蒙采樵之處

陸山有石匱

故治山一峰上有碑云是徐水曹壇天帝曲水之曹旱

牽牲至塘頂祀之則有暴水洗塘

長檣山秦始皇鑿山以造帆檣因名

吳郡志卷十五

欽定四庫全書

吳郡志卷十六

宋 范成大 撰

虎丘

虎丘山又名海湧山在郡西北五里遙望平田中一小丘吳地記云去吳縣西九里二百步高一百三十尺周二百十丈比入山則泉石奇詭應接不暇其最者劔池千人坐也劔池吳王闔廬葬其下以扁諸魚腸等劔各三千殉焉故以劔名池葬之三日有白虎踞

其上故山名虎丘唐避諱曰武丘劒池浙中絕景兩岸劃開中涵石泉深不可測王禹偁序蘇文忠公軾詩形容甚工千人坐生公講經處也大石盤陀數畝高下如刻削亦它山所無又有秦王試劒石點頭石憨憨泉皆山中之景好事者云天下名山所見不及所聞獨虎丘所聞不及所見也其古事載傳記尤多晉王珣虎丘記曰山大勢四面周回嶺南則是山徑兩面壁立交林上合蹊路下通升降窈窕亦不卒至

珣又為銘序云武丘山先名海湧山吳越春秋曰闔閭死葬於國西北虎丘穿土為山積壤為丘餘見雲

巖寺及往蹟冢墓攷證等門

獨孤及夜宴序云方今內有變龍臯伊以佐百

揆外有方叔召虎以守四海天下之人高枕無事則琴壺以宴朋友笑歌以展霞月吾黨之職也我是以有今茲虎丘之會巖巖虎丘奠吳西門萃然如香樓金道自下方而踴鑠丹霞白雲於蓮宮之內會之日和氣滿谷陽春逼人巖烟掃除肅若有待余與友人亂行於鷗鳥銜流霞之杯而羣嬉乎其中笑向碧潭與松石道舊兇觥既發賓主醉止狂歌送酒坐者皆和吳趨敷奏雲去日沒梵天月白萬里如練松陰依依狀若留客于斯時也挽雲山為我輩視竹帛如草芥頽然樂極衆慮皆遣於是奮髯屢舞而歎今夕何

欽定四庫全書

卷十六

夕同者八人醉罷皆賦以為此山故事皎然陪陸長
源裴樞遊武丘雲水夾雙刹遙疑涌平陂入門見截
山元化何由窺曳組探詭怪停驂訪幽奇情高氣為
爽德暖春亦隨瑤草自的皪黃樓爭蔽虧金精發壞
陵劒彩沈靈池一覽匝天界中峰步未移應來遠公
石列生援松枝李峴劒池闔閭葬日勞人力秦帝穿
來役鬼功澄碧尚疑神物在等閑雷雨起潭中趙嘏
虎丘贈魚處士蘭若雲深處前年客重過巖空秋色
動水閣夕陽多早負江湖志今如鬢髮何惟君閑勝
我釣艇在煙波皮日休虎丘寺西小溪閑泛詩鼓子
花明白石岼桃枝竹覆翠嵐溪分明似對天台洞應
厭頑仙不肯迷陸龜蒙樹號相思枝拂地鳥語提壺
聲滿溪雲涯一里千萬曲直是漁翁行也迷許渾暫
引寒泉濯遠塵此生多是異鄉人荆溪夜雨花飛疾
吳苑秋風月落頻萬里高低雲外路百年榮辱夢中
身世間誰似西林客一卧煙霞四十春權德輿酬陸

四十虎丘對月東風變蘅薄時景日妍和更想千峰
夜浩然幽意多蕙香襲閑趾松露滴喬柯潭影漾霞
月石牀封薜蘿夫君壯歲時已負青冥姿龍虎一門
盛淵深四海推駸駸步驟褻婉婉翥長離玄圃盡瓊
樹家林輕桂枝聲榮徒外獎恬淡方自適逸氣凌顥
清仁祠訪金碧芊眠瑶草秀斷續雲竇滴芳訊發幽
緘新詩比良覲故人石渠署美價滿中朝落日杉松
直芬芬蘭杜飄雄詞鼓溟海曠度詔煙霄營道幸同
街論心皆後凋循環伐木詠緬邈招隱情慙茲臃腫
才愛彼潺湲清拘牽尚多故夢想何由并終結方外
期不待華髮生白居易香剎看非遠祇園入始深龍
蟠松矯矯玉立竹森森怪石千僧坐靈池一劒沈海
當亭兩面山在寺中心酒熟憑花勸詩成倩鳥吟寄
言軒冕客此地好抽簪○夜遊西武丘不厭西丘寺
閒來即一過舟船轉雲島樓閣出烟蘿路入青松影
門臨白月波魚跳驚秉燭猿覷怪鳴珂搖曳雙紅旆

欽定四庫全書

卷十六

三

娉婷十翠娥十容滿
領郡時將久遊山數幾何也香花助羅綺鍾楚避笙歌

○武丘寺路自開山寺路水陸往來頻銀勒牽驕馬
花船載麗人芰荷生欲遍桃李種仍新路去桃李重開梅寺

別銀泥裙映錦障泥畫舸停橈馬簇蹄清管曲終鸚

鵲語紅旗影動駭鶴嘶漸銷醉色朱顏淺欲語離情
翠黛低莫忘使君吟詠處女墳湖北虎丘西作駭鵲一

李紳秋山古寺東西遠竹院松門悵望同幽鳥靜時
侵徑月野煙消處滿林風塔分朱鴈餘霞外剎對金

蟬落照中官備散寮身却累往來慙謝二蓮宮劉禹
錫青林虎丘寺林際翠微路立見山僧來送從鳥飛

處茲峰淪寶王千載惟丘墓埋劍人空傳鑿山龍已
去捫蘿披翳蒼路轉夕陰遽虎嘯涯谷寒猿鳴松杉

暮徘徊北樓上海江窮一顧日映千里帆鵝歸萬家
樹暫因慙所適果得指外慮庭暗棲還雲簷香滴甘

露久迷空寂理多為聲華故永欲投此山餘生豈能
誤劉禹錫虎丘見元相公題名愴然有詠漉水送君
君不還見居題字虎丘山因公蚤貴無才美不得多
時在世間○登虎丘望海樓獨宿望海樓夜深珍木
冷僧房已閉戶山月方出嶺碧池涵劒彩寶剝搖星
影却憶郡齋中虛眠此時景清遠道士同沈恭子遊
虎丘我本長殷周遭罹歷秦漢四瀆與五嶽名山盡
幽竄及此寰區中始有近峰翫近峰何鬱鬱平湖渺
瀾漫吟挽川之陰步上山之岸山川共澄澈光彩交
凌亂白雲翳欲歸青松忽消半客去川島靜人來山
鳥散谷深中見日崖幽曉非旦聞子盛游遨風流足
詞翰嘉茲好松石一言常累歎勿謂余鬼神忻君共
幽贊顏真卿刻清遠道士詩因而繼作不到東西寺
于今五十春竭來從舊賞林壑宛相親吳子多藏日
秦皇厭勝辰劒池穿萬仞盤石坐千人金氣騰為虎
琴臺化若神登壇仰生一捨宅歎珣珉中嶺分雙樹

迴鑾絕四鄰。窺臨江海接。崇飾四時新。客有神仙者。
於茲雅麗陳。名高清遠峽。文聚斗牛津。迹異心寧間。
聲同質豈均。悠然千載後。知我挹光塵。李德裕追和。
顏真卿茂苑有靈峯。嗟余未遊觀。藏山在平陸。壞谷
為高岸。閭繞數仞牆。巖潛千丈幹。乃知造化意。回幹
資奇翫。鏐騰昔虎踞。劒沒常龍煥。潭黛入海底。崋峯
聳霄半。層巒未昇日。哀狖寧知旦。綠篠夏凝陰。碧林
秋不換。冥搜既窈窕。迴望何蕭散。川晴嵐氣收。江春
得英亂。逸人綴清藻。前哲留篇翰。共_{猶房}和哀玉音。皆舒
文繡段。難追彦回賞。_{晉唯見虎丘則適其所聞}徒
起興公歎。一夕如再升。含毫星斗爛。皮日休追和清
遠道士詩序。虎丘山有清遠道士詩一首。其所稱自
殷周而歷秦漢。迄于近代。抑二千年未以鬼神自謂
亦怪之甚者。格之以清健飾之以俊麗。一句一字若
奮若搏。彼建安詞人。倘在不得居其右矣。顏太師魯
公愛之刻於巖際。并有繼作。李太尉衛公欽清遠之

高致慕魯公之素尚又次而和之頽之敘事也典李
之屬思也麗並一時之寡和又幽獨君詩二首亦甚
奇愴余嗜古者觀而樂之因總而為和答不知孰氏
之作其辭古而悲亦存于篇末噫清遠道士果鬼神
乎抑道家者流乎抑隱君子乎詞則已矣人則吾不
知也詩云成道自袁周避世窮炎漢荆杞雖云梗烟
霞尚容竄茲岑信靈異吾懷慝流翫石澀古鐵銑嵐
重輕埃漫松膏膩幽逕蘋末著孤岸諸蘿幄幕暗衆
鳥陶匏亂巖罅地中心海光天一半玄猿行列歸白
雲次第散蟾蜍生夕景沆瀣餘清旦風人抹幽什墨
客學靈翰嗟余慕斯文一詠復三歎顯晦雖不同茲
吟粗堪贊陸龜蒙追和清遠道士一代先後賢聲容
劇河漢况茲邁古士復厯蒼崖竄辰經幾十萬邈與
靈壽翫海嶽尚推移都鄙固蕪漫羸僧下高閣獨鳥
沒遠岸嘯初風雨來吟餘鐘唄亂如何鍊精魂萬祀
忽欲半寧為斷臂憂肯作秋柏散吾聞鄴宮內日月

自啓旦左右修文郎縱橫灑篇翰斯人久溟漠得不
垂慨歎庶或有神文相從重興贊陸龜蒙補沈恭子
詩序案清遠道士詩題中有沈恭子同遊既為神怪
之傳得非姓氏謚為恭子乎趙宣子韓獻子之類耶
恭子美謚也而詩中有風流詞翰之稱豈獨唱而不
和者歟疑闕其文以為恭子之恨乃作一章存於篇
中亦補亡之義也詩云靈質貫軒昊遐年越商周自
然失遠裔安得怨寡傳我亦小國瘠易名慚見優雖
非放曠懷雅奉逍遙遊攜手桂枝下屬詞山之幽風
雨一以過林麓颯然秋落日倚石壁天寒登古丘荒
泉已無夕敗葉翳不流亂翠缺月隱衰紅清露愁覽
物性未逸反為情所囚異材偶絕境佳藻窮冥搜虛
傾寂寞音敢作雜佩訓晁迴遊虎丘詩序余罷掌賦
東陽歸次蘇臺時故人王士龍飲餞乎閭門且曰虎
丘山寺吳中勝槩不越數里可能遊乎余沛然愜心
諾而偕往由枝派乘扁舟嘯清風目幽趣棹工叢力

葉舟如飛拂白英以半開紫紅樹以傍出道詣幽境
復無纖塵相與披煙蘿凌磴道杳疑天外作為佛宮
俯臨劍池呀若斷岬磊砢齒萃不能形容肆凝覽以
東周惜頽景之西匿一觴一詠柅輿而還遂裁八章
以表嘉會時淳化四載自序詩云餞別閭門復少留
故人邀我浣離愁旋沽美醞乘漁艇急棹斜陽到虎
丘千古劍池呀怪石一方金地枕清流歸時春戀情
無限不得從容秉燭遊王禹偁蘇牆圍着碧孱顏曾
是當年海湧山盡把好峯藏寺裏不教幽境落人間
劍池草色經冬在石座苔花自古斑珍重晉朝吾祖
宅一迴來此便忘還○遊虎丘觀白傅舊題因而有
作樂天曾守郡酷愛虎丘山一年十二度五馬來松
闕我今方吏隱心在雲水間野性羣麋鹿忘機狎鷗
鷗乘興即一到興盡聊自還不知使君貴何似長官
閒○徒勞官職在天涯一望家園一淚垂不是虎丘
多勝槩拂衣歸去已多時○吳王墓惜哉吳王墓秦

欽定四庫全書

卷十六

帝欲開破應笑埋金玉千年賈餘禍不待虎跡銷已
聞鮑車過又是驪山頭炎炎三月火陳堯佐雲際樓
臺樹杪軒孤松千尺聳平田危欄遠思微吟好隱隱
秋帆半入天○人間靈迹遍曾遊祇欠吳門訪虎丘
今日偶來無限感閭閻墳左劍池頭丁謂久塵黃閣
侍威顏忽擁高牙出帝闕玉珮乍辭文石陛錦衣重
到虎丘山仙飄時傍潺湲起珍羽多從杳靄還官大
寵深難得暇林泉懷舊是偷閒○梅詢鳳池初下陟
孱顏虎寺重遊啟舊闕金鉞傳呼投釣渚寶天輝映
讀書山卧龍昔日曾三顧遼鶴千年始一還應為蒼
生須再起草堂蘿幄詎容閒范仲淹昔見虎耽耽今
為佛子巖雲寒不出寺劍淨未離潭幽步蘿垂徑高
禪雪閉庵吳門十萬戶烟瓦亘東南蔣堂虎丘何為
山鯨波湧而顯姑謂海惟青鎮一隅峙秀狀無限遙
峯乃衆陰四望拱孤巘上有梵王家高壓長洲苑遊
人接踵來千里必重趼奔走超層巔凌兢陟雲棧下

瞰洞庭平傍晚晚靈巖淺巍乎屹寶閣仰之目睛眩中
 有明光書麗若日星烜三朝所祕歲百靈共幽贊茲
 焉真福庭瞻者皆色灑銑音北嶕宿雪寒東阜晨曦暖
 塔頂拂彤霞山脚環清北磬落雲端宵燈耿天半
 陰森巖腹空詰屈廊腰轉秋磬落雲端宵燈耿天半
 處者病惱蠲來者鈍根遣予膺邦寄時所歷遊屐遍
 不領旌旗行恐驚禽鹿散捫蘿窮邃深據檻望平遠
 尋幽既歡欣訪古或興歎葬金墳已隳泮劍池猶漫
 冰霞凋古杉皮陸所詠朱丹浮斷簡得今秋鹿下泉湧
 古米書號有珍重講石存議評鬼詩誕唐賢留風什遺墨
 羅粉版險詒悉冥搜清景不可追李衛下屬公顧魯在國
 朝有筆札巖壁刻稜婉刀稍君謨書龍蛇不疑篆蔡書
 生公臺篆二美貴禪高千古駭人眼於時出世師淨
 住日營繕發緣善侶臻畢力梓工傷紺宇生光輝勝
 槩如采絢海眾咸安棲宗風愈恢闡迦陵覺音清石
 室驚籌滿自惟挂纓歸心與紛拏斷每來尋香刹常

得我野升久留蓮漏移相接犀談款露井汲雲漿有山

漸陸井鴻

冰甃試芳菲最憐草樹春幾愛烟嵐晚願借一

庵石於茲修止觀○林端生色美新晴樓閣依山若
畫屏石座最宜人選勝劒池潛想地遣靈僧憇松竹
冬尤茂寺路煙霞晝亦冥自愧踰年假麾守一迴方
得扣禪扃張伯玉東客從來過虎丘橘花渡口維扁
舟闔閭宮殿不可見但對古塔寒飈颺憶昔吳王全
盛日水犀十萬橫吳鉤楚山既掘荆人塚越嶺仍將
句踐囚豈謂西施能破國誰知麋鹿上臺遊惟有吳
王在時月夜深閑照劒池秋王紳山頭古寺多陳迹
故國空餘氣象雄霸業已隨流水去闔閭墳草又西
風蘇軾入門無平地石路穿細嶺陰風生澗壑古木
翳潭井湛盧誰復見秋水光耿耿鐵花秀巖壁殺氣
嗾蛙黷幽幽生公堂左右立頑礪當年或未信異類
服精猛胡為百歲後仙鬼互馳騁竊然留清詩讀者
為悲哽東軒有佳致雲水麗千頃熙熙覽生物春意

破淒冷我來屬無事暖日相與永喜鷗翻初旦愁鷺
蹲落景生見漁樵還新月溪上影悟彼良自咍歸田
行可請○和劉孝叔會虎丘白簡威猶凜青山興已
濃鶴閑雲作氍毹卧草埋峯跪屐若可教卜鄰應更
容因公問回老何處定相逢○太常齋未解不肯對
纖穠只遣三千履來遊十二峯林空答清唱潭淨寫
衰容歸去瑤臺路還如月下逢朱長文蒲章諸公唱
和詩題辭虎丘之景蓋有三絕望山之形不越岡陵
而登之者見層峯峭壁勢足千仞一絕也近臨郭郭
矗起原隰旁無連屬萬景都會西聯穹窿北亘海虞
震湖滄洲雲氣出沒廓然四顧指掌千里二絕也劒
池泓渟徹海浸雲不盈不虛終古湛湛三絕也無是
絕景冠以佛宮寶塔精廬重樓飛閣磻磻峻嶒梯巖
架壑東南之勝罕出其右故自晉唐至于聖朝儒先
文士宗工逸客風什相繼皆嘗集錄吳郡詩得虎丘
之作七十餘篇其遺落而失傳者又可勝道哉左丞

河東蒲公自杭帥鄆弭節閭扉一登此山坐小吳會
歎賞不已形于詠歌於是樞密豫章章公使君劉公
通守王君欣聞嘉製屬而和之思與境會情以辭宣
高義薄雲霞正聲合鍾律足以為海湧之榮觀中吳
之美實使顏李大句劉白高風不專美于是矣蒲公
又有六詠刻之它石云元祐三年四月蘇州州學教
授朱長文題蒲宗孟長松遶步水灣環寺據吳王塚
墓間瘦石千層開碧玉疎圍十里裏青山壁從地上
漸巖起雲出門前自在閑零落生公講臺下無人說
法但空還○遊虎丘因書錢塘舊遊失却湖山恨去
舟新年無意作春遊東風昨夜思龍井曉雨全家入
虎丘望見遠峯疑石街勝處鷗峰悞尋歸路認花樓
處勝明朝一出閭門去清夢遙知在兩州章子厚闔閭
城外小層巒瘦竹寒松數里間並岼逢僧知近寺入
門鑿石漸登山純鉤劍化空池在幽獨詩成白日閒
遊客幸無官事束何須齋舫斂昏還○傳聞城角艤

行舟自擁笙歌選勝遊偶為寒江阻潮汐再容清賞
屬林丘燕回吳苑風和雪夢斷錢塘月滿樓盡把蘇
杭好烟景醉吟將去說東州蘇舜欽重事飄然付一
舟吳山蕭寺且淹留白雲已有終身約醪酒耶驅萬
古愁峽束蒼淵深貯月巖排紅樹巧裝秋徘徊欲出
向城市引領烟蘿空自羞楊備闔閭城見古荒丘雲
裏鐘聲滿寺樓白虎金晶人不見昔曾雄踞此山頭
○劒池三尺龍盤古到今波光凝碧暮雲深沈絲不
斷應無底山脚池心徹海心○試劒石白刃凝霜照
水寒當時人匣使迴鑿巖前片石猶中斷切玉如泥
也不難○生公講堂海上名山即虎丘生公遺跡至
今留當年說法千人坐曾見巖邊石點頭孫觀冬溫
陽久亢一雪意頗快乘興泛扁舟出郭信如邁放棹
得虎丘恍然銀色界瑤山夾細逕瓊樹偃曲蓋引步
到層樓極目吳城隘飛鷺翔空中千峯冪天外景虛
雲可凌寒重酒易解羣兒慶老翁於此氣不憊○多

病身如寄長貧氣自華只將窮事業便當老生涯泥
飲醉生纈挑燈喜見華慙慙香火社問病到毗耶禪
客青鞋軟詩翁白帽斜驚回蝶栩栩喜聽鵲查查推
戶風敲竹登牀雨散花匆匆一笑許隻履上青霞程
俱四顧渺平野孤撐見林丘常疑湧地出倘復海所
浮上有千人臺靈蹤想前修無情契深義頑石亦點
頭下有百尺淵神光千斗牛陰崖不見日草木皆先
秋兩晉多達士東亭抑其流結廬遠車馬寄此山之
幽一朝施白足棄去如毛輶矧伊桑下宿肯作賈胡
留○尋壑復經丘人看李郭舟藤花多背日桐葉最
知秋虎去藜藿盡龍歸蛙黽愁振衣臨石壁未羨習
池遊何麒平地涌巖壑稜層驚大雄何曾遠人世真
欲傍天宮白虎威靈在赤烏綠影空生公能說法音
與塔鈴同方惟深晉人事高曠所得多奇僻雲巖佛
子廬曾為二王宅當時槃樂地俯仰成今昔林泉亦
余好徘徊想遺跡那知非昔人復作登臨客○劒池

雲崖倚天開蒼淵下澄澈世傳靈劍飛山石千丈裂
神蹤去不返今作蛟龍穴是非濟難詰歲久多異說
惟當清夜來靜賞潭上月○千人石生公天人師講
法花雨墮當時聽法衆片石千人坐山祇常護持山
鳥不敢汚野人心茫然傲蕩多酒過醉來不肯歸石
上看雲卧方仲荀海湧起平田禪扉占木間出城先
見塔入寺始登山堂靜參徒散巢喧乳鶴還祖龍求
寶劍曾此鑿孱顏王禹偁劍池銘并序虎丘劍池泉
石之奇者也吳地記引秦皇之事以為詭說考諸舊
史則無聞焉矧儒家者流不可語怪因為銘以辯之
銘曰茂苑之側震澤之濶同巖巖虎丘沈沈劍池峻
不可以仰視深不可以下窺我疑乎太極作怪化工
好奇水物設險山妣忌危陷其泉也蓋取諸坎礫其
石也以象乎離艮有止兆蒙無亨期構此屯難成乎
險巖直恐夏后弗能導之豈惟秦皇而能肇茲蓋其
始也一氣發泄兩儀分別爭融鬬結擊搏而裂斷壁

雙揭摩雲不徹翠禿青殘挫銳而中絕寒流下咽犇
山未決雪壅雷收拘怒而曲折蹙束湍瀨呀槎洞穴
鱗翻成窟龍戰有血匪自人力蓋從天設誰謂一拳
登之惟艱誰謂一勺挹之不竭池實自然劒何妄傳
我欲涉道如池之淵我欲立節如石之堅位以道取
名以節全濡筆池心勒銘山巔破衆惑焉言余志焉
徐閩劒去池空一水寒遊人到此凭欄干
年來是事消磨盡只有青山好靜看詩清

吳郡志卷十六

欽定四庫全書

吳郡志卷十七

宋 范成大 撰

橋梁

唐白居易詩曰紅欄三百九十橋本朝楊備詩亦云畫橋四百則吳門橋梁之盛自昔固然今圖籍所載者三百五十九橋在郡城者今以正中樂橋為準分而為四達隨方敘之門外及外縣略附見焉

樂橋之東北

妻門
齊門

百口橋在長洲縣東東漢顧訓五世同居族聚百口
衣食均等尊卑有序因其所居以名橋俗傳子
孫多不能辨架上之衣歲朝會集子孫悉坐依
次行酒三歲以上者並自知位次不虧其禮故
俗又名試飲橋

臨頓橋在長洲縣北臨頓吳時館名取之臨頓宅
者是也又吳地記名吳王親征夷人頓軍憩歇
宴設軍士因此置橋唐陸魯望常居其旁

皮日休共

老林泉忍暫分此生應不識迴文幾枚竹筍送
德曜一乘柴車迎少君舉樂品多緣澗藥承家
事少為溪雲居然自是幽
人事輒莫教他孫壽聞

苑橋在報恩光孝寺之西故傳闔閭有苑園在其
傍定跨橋下長洲縣前舊為闔閭故跡縣前東
南故傳皆闔閭苑園遊憩之地

顧家橋顧悌仕吳為虎頭將軍父亡五日絕漿而
死郡人為之造橋

吳地記

四通橋

紹興二十六年建

定跨橋吳王闔閭造

吳地記

開明橋

醋坊橋

金師堂橋

馬黃橋

管家橋

紅爐子橋

換馬橋

瓶場橋

永福寺橋

北倉橋

天心橋

宮橋

廣化寺橋

金師子橋

靈鷲寺西橋

鶴舞橋

又吳地記云夫差女勝玉出葬日仙鶴舞引羣鳴於市因號橋曰鶴舞或又云春申

君所立也

中路橋

狄勝橋

華家橋

跨塘橋

北新橋

蔣家橋

院子橋

新街橋

吳郎橋

廟堂橋

任蔣橋

南新橋

周通橋

縣東橋

徐思橋

顧周橋

雙板橋

大郎橋

衆喜橋

雪糕橋

積慶橋

蘇軍橋

衆安橋

通利橋

慶厯橋

華陽橋

迎春橋

寺莊橋

奚家橋

富孫橋

魏家橋

唐家橋

羅家橋

熙寧橋

廟堂橋

張香橋

胡家橋

斜路橋

程家橋

棧橋

花橋

東石塘橋

東章家橋

錢都衙橋

兵馬使橋

胡廂使橋

打急路橋

北張家橋

朱馬交橋

南張家橋

徐鯉魚橋

廣化寺後橋

北禪寺西橋

北禪寺前橋

北禪寺東橋

長洲縣前橋

天宮寺前橋

天宮寺西橋

萬壽寺東橋

資壽寺西橋

資壽寺後橋

祥符寺東橋

東周太保橋

樂橋之西北

閭門

臯橋在吳縣西北閭門內漢議郎臯伯通居此橋

側因名之

李紳伯鸞憔悴甘飄寓非向囂塵隱
姓名鴻鵠羽毛終有志素絲琴瑟自

諧聲故橋秋月無家照舊井寒泉見底
清猶有餘風未磨滅至今鄉里重和鳴

三太尉橋

都亭橋

在吳縣西北故傳吳王壽夢
嘗於此作都亭以招賢士

至德廟橋

在太伯廟前
以廟故名

張廣橋

慈悲橋

烏盆橋

鄔家橋

穀市橋

小市橋

小平橋

普濟橋

魚行橋

柳毅橋

虎蹲橋

梵門橋

徐胡橋

劉家橋

壽聖橋

華家橋

楊家橋

徐家橋

仰家橋

鳳凰橋

高家橋

廣書橋

席家橋

沈家橋

方廣橋

德慶橋

翁家橋

丁家橋

艇船橋

安民橋

崇利橋

單家橋

曹使橋

絲行橋

利市橋

鵝欄橋

鴨舍橋

濟川橋

靱鞋橋

蒲老橋

六通橋

文家橋

盧家橋

使橋

錢橋

紅橋

宮橋

洞橋

隆興橋

隆興元年建

黃牛坊橋

錢駙馬橋

朱明寺橋

吳縣東橋

吳縣西橋

黃土塔橋

西蔣家橋

小蓮湖橋

女冠子院橋

陸侍郎橋

南過軍橋

北過軍橋

盧提刑橋
盧革自德清退老于吳以通議大夫致仕嘗除廣南提點刑獄後郡人以提刑名橋子秉為發運使詳見人物門

西市門橋

芝草營橋

西石塘橋

周太保橋

張馬步橋

祥符寺橋

西章家橋

雍熙寺西橋

禪興寺西橋

龍興寺西橋

雍熙寺東橋

雍熙寺後橋

能仁寺東橋

能仁寺後橋

樂橋之東南

荊門

乘魚橋在子城之西北昔琴高乘鯉升仙之地事

具異聞

至和元年僧達本重建橋序乘魚橋當姑蘇之要津茂苑之靈跡按吳地誌云

古者賢士丁法海琴高於此地見大鯉魚長可丈餘有角有足鼓三翼而舞琴高見其異遂乘魚騰飛宛轉駕空上昇因立橋名

烏鵲橋在提刑司之南舊傳古有烏鵲館橋因其

館得名

楊備烏鵲橋上元詩云月滿星移水照天南飛烏鵲影翩翩雖然上屬牽牛分

不為秋河
織女填

竹隔橋

飲馬橋

南倉橋

帶城橋

馬津橋

望信橋

夏侯橋

金母橋

燕家橋

淨河橋

小博橋

在倉司前

清道橋

迎葑橋

船場橋

望門橋

雙紅橋

章家橋

曹家橋

楊家橋

董家橋

朱家橋

船坊橋

紅鴨橋

龍堂橋

東長橋

西長橋

燒香橋

唐家橋

望營橋

佐家橋

胭脂橋

驅鬼橋

沙糕橋

蔣家橋

白蜆橋

盡市橋

顧亭橋

遊仙橋

平橋

閭橋

草橋

甫橋

洞橋

祝橋

星橋

磚橋

程橋

營橋

至橋

尤橋

篠橋

胡書記橋

官太尉橋

吳承議橋

南胡家橋

採蓮涇橋

覺報寺西橋

覺報寺後橋

楊府院子橋

雙塔寺前橋

東禪寺西橋

折桂橋

紹興二十七年內建

樂橋之西南

盤門

孫老橋在運河上唐白頭橋也郡守白居易所建

因是名之本朝天聖初郡守孫冕重修故易今

名

梅摯過白頭橋詩云白頭橋奈白頭何唐是伯公建之因得人呼孫老舊德如存故老謁不特

輿梁起遺愛大都才美服人多

西館橋

太平橋

薦行橋

市曹橋

白礮橋

娥眉橋

郭家橋

杉瀆橋

明澤橋

吉利橋

昇平橋

翦金橋

銀錠橋

積善橋

胡家橋

成家橋

渡子橋

趙公橋

趙婆橋

葛家橋

張師橋

蔡家橋

諸家橋

杉板橋

木柴橋

院子橋

倉後橋

樓西橋

程基橋

果子橋

草鞋橋

獻花橋

望婆橋

芮家橋

彈子橋

芮橋

梅橋

程橋

新橋

廟橋

北張師橋

南張師橋

西竺寺西橋 開元寺東橋 開元寺後橋

憩橋吳軍憩歇因名之

吳地記

門外外縣橋梁

城門外

府圖

行春橋續圖經云在橫山下越來溪中湖山滿目
亦為勝處橋甚長跨溪湖之口好事者或名小
長橋歲久廢闕淳熙十六年縣令趙彥真始復
修之勝槩為吳中第一

新橋在盤門分為三橋者製度甚宏

吳門橋

綠雲橋

並盤門外

虹橋

婁門

虹橋

齊門外

虹橋

渡僧橋

山塘橋

絲雲橋

半塘寺前

便山橋

虎丘寺前

楓橋在閭門外九里道傍自古有名南北客經由

未有不憩此橋而題詠者事具楓橋普明院

洞橋

已上並閭門外

斜橋

安里橋

已上並葑門外

秀峰橋

顏橋

張墅橋

新郭橋

藏圓橋

楞伽寺橋

謳橋

埤橋

短橋

黃蘆橋

何橋

夏駕橋

虎山橋

靈巖寺橋

胥門橋

橫塘橋

越來溪橋久廢淳熙中居民薛氏以奩具錢復立之越來溪水自此橋北流過橫塘也

練墟新橋

已上盤門外

已上在吳縣長洲縣管下詳見舊經

縣橋

驛橋

程橋

看婆橋

雙鳳橋

馬郊橋

泄水橋

通泄橋

富基橋

徽浦橋

八尺橋

卓基橋

盛墩橋

安德橋

合路橋

南醋坊橋

南泄水橋

第一醋坊橋

已上在吳江縣管下詳見舊經

安民橋在新涇中

利民橋在七里涇

濟民橋在吳涇事具續圖經

利往橋即吳江長橋也慶厯八年縣尉王廷堅所
建有亭曰垂虹而世併以名橋續圖經云東西
千餘尺前臨太湖洞庭三山橫跨松江為海內
絕景紹興初中外戒嚴或獻計樞庭乞行下平
江焚長橋時郡守洪遵持不可而縣民已有知
之者相與聚哭於地下矣橋兩圯南有匯澤亭

北有底定亭餘見松江條

鄭獬吳江橋詩云三百欄干鎖畫橋行人

波上踏靈鰲拂天蟬蛛玉腰濶跨海鯨鯢金背
高路直鑿開元氣白影寒壁破大江豪此中自
與銀河接不必仙槎八月潮蔣堂鴈翅橋橫五
湖北翬飛亭屹大江心魚龍淵藪風月窟若比
廣寒宮
更深

吳郡志卷十七